

萬有文庫

第一集一千種

王雲五主編

藝舟雙楫

(二)

包世臣著

商務印書館發行



藝舟雙楫
(二)
包世臣著

國學基本叢書

種千一集一第

楫雙舟藝

冊二

著臣世包

路山寶海上
館書印務商 者刷印兼行發

埠各及海上
館書印務商 所行發

版初月十年八十國民華中

究必印翻權作著有書此

The Complete Library

Edited by
Y. W. WONG

NI CHOU SHUANG TSIEH

By

PAO SHIH CHEN

THE COMMERCIAL PRESS, LTD.

Shanghai, China

1929

All Rights Reserved

藝舟雙楫第一冊目錄

論文四

張童子傳	嘉慶癸亥	一
畢成之墓志	丁卯	二
清故揀選知縣道光辛巳舉人包君行狀	道光丙戌	三
清故優貢生孫君墓誌銘	癸巳	七
與陳孝廉金城書	癸巳	八
清故翰林院編修崇祀鄉賢姚君墓碑	壬辰	一〇
清故文學汪君之碑	戊子	一一
清故國子監生凌君墓表	己丑	一三
清故文學薛君之碑	己丑	一四
皇敕授修職郎安徽寧國縣學訓導沈君行狀	壬辰	一六
翟秀才傳	甲辰	一〇

論書一

述書上嘉慶丁丑	一一一
述書中丁丑	一一二
述書下戊寅	一一三
歷下筆譚己卯	一一四
後附四則	一一五
與金壇段鶴臺明經論書次東坡韻戊寅	一一六
論書十二絕句己卯	一一七
國朝書品道光甲申	一一八
答熙載九問辛卯	一一九
答三子問辛卯	一二〇
論書二	一二一
書譜辨誤道光壬辰	一二二
跋榮郡王臨快雪內景二帖丁丑	一二三
書臨平原祭姪稿後丁酉	一二四
題隋誌拓本丁丑	一二五
白跋刪擬書譜壬辰	一二六
五三	一二七
五二	一二八
五一	一二九
五〇	一二〇
四八	一二一

自跋草書答十二問 王辰

十七帖疏證 癸巳

與吳熙載書 癸巳

書黃修存藏宋搨廟堂碑後 癸巳

書劉文清四智頌後 癸巳

自跋真草錄右軍廿六帖 癸巳

書陳雲乃集其先公寫廢壽樟字爲四言詩卷後 甲午

跋重刻王夫人墓誌 癸卯

記兩筆工語 嘉慶戊寅

記兩棒師語 戊寅

完白山人傳 嘉慶丙寅

刪定吳郡書譜序 道光壬辰

補遺(據翠琅玕館本)

雜詩示十九弟季懷

贈山陽吳生璜

邵生碣文

五三

五五

六三

六四

六六

六七

六八

六九

七二

七五

藝舟雙楫 目錄二

張尚平傳

四

四

藝舟雙楫

論文四

張童子傳

童子名楚生，姓張氏，和州之烏江人也。其祖年七十餘，祔於霸王廟而生童子，故名之曰楚生。幼聰慧，六歲就外傳日記數十百字，同硯席有讀爾雅者。童子請於師亦受讀焉，遂通古訓。乾隆丙午正月，予隨先子謁青山寺祖墓，道出烏江，遇大雪，主其家五日。童子與予生同年，月日而稚，四時甚相愛。予見其書室有故籍百餘卷，繙閱殆徧。童子曰：「讀書泛覽無益。吾日讀二千字，三徧即可倍。五徧即大熟，然至其愜意者，暇隙諷誦常至數千徧，必便自明其義。」注解多不可靠也。予詰其所自得，童子曰：「論君子不重章。是夫子教君人之道，非爲爲學者言也。不重不威，卽所謂不莊以泄之，則民不敬也。固陋也。唯學可以變陋。哀公曰：寡人固不固，何能聞此言？是此固字注脚。君人者有威有學，則恐其尙詐任讒，故要以忠信爲主。然必求勝己者爲輔佐，友不如己，卽孟子所謂好臣其所教也。若云爲學擇友，則恐人將拒我矣。雖然，內有主，外有輔，猶不能無過，必勿憚改。而君德乃全，書頌湯德曰：『改過不吝。』者此也。又云齊宣王見孟子於雪宮，是宣王出遊，途中遇孟子而見之，故曰：『於崇吾得見王。』而通章皆言遊觀之事也，非其鬼而祭之，鬼謂人鬼。古惟祭其先，曰事鬼，祭非鬼，卽禮記所謂與爲人後者也。又言大畜剛健篤實，輝光日新，當斷句，其德連下文爲句，旣叶韻，又與全經筆法相稱。若如今讀作日新其德，是宋朝人語已。又言史記項羽本

紀贊先云羽背關懷楚放逐義帝而自立怨諸侯畔已難已末云乃引天亡我非戰之罪豈不謬哉言羽之失天下實自失之非天亡也蓋背關懷楚則失地利放帝自立則負不義之名怨諸侯畔已則與天下爲難有此三失難以有天下矣又言鄉黨一篇記孔子者少計君子學孔子者多凡記孔子事皆言似言如而記君子學孔子則言不言必予嘆絕謂之曰吾子精熟經史心有古初何以尙不學作詩文童子曰學在內者也文在外者也俟弱冠內學充而後學文豈爲遲乎雪霽別去而次年童子遂殤於痘後予讀漢書三國志屢見輝光日新之語知古讀正如此讀集解其訓學則不固也如童子說見陽湖惲子居論鄉黨說與童子無異而猶疑友字於君臣或未安及讀毛傳言國君友其賢臣讀呂覽言敦治讐靡惡足以駁人言足以亡國而友之足於陳侯而無上至於亡而友不衰然後信童子所說無不根據精當殆古經生之講降而曇花一現者也予成童後誦過秦論古詩十九首皆萬過漸有心得感此說之實發於童子也故次爲傳以傳其略不敢私爲已有焉嘉慶癸亥十月

畢成之墓志

君諱貴生字成之一字孝伯姓畢氏儀徵縣學生員其先歛人祖懷圖舉人官湖南永興縣知縣考合不仕君考娶於江都汪氏旣侍永興君於漢陽母氏遂依外家以撫君君舅汪中以多聞能詞賦名於時甚器君妻以次女君舅常遠遊母氏故通史家言於兩漢事尤熟卽自課君君以是諳古有舅風君好用情而致之或未當旣已不肯下人而相接常默默君舅旣沒益莫能善君者境益困求舉又屢黜於有司所覩之皆毀途迫也君故多隱憂晝夜傭書給衣食嘗日作正書二萬字而不得廢酬酢以是君益羸余以

壬戌夏客揚州始識君甲子復至交尤善自甲子迄今四年余大半在揚州所遇皆窮舊友莫復顧者獨君拳拳甚過從不間君嘗從余問詩法而所作頗不相似然君詩每年輒進每進輒腴健無近世聞人雜亂淆濁之態丙寅秋君以詩書見賞於兩淮鹽政君旣極困或勸君當不時至因有所請然君卒未嘗再謁也今年二月余赴常州視友人疾君出門卽無所之常語母氏曰慎伯去兒愈益無俚余返自常州君以試事赴泰州余復赴清江浦十餘日而君自泰州病春溫歸余急過視君君病狀殊無所苦各述近況不可休亦不倦也君忽把手語余曰吾此疾恐不起卽起今年終不免吾昔語足下以夢前生爲斷頭將軍吾前日歸自泰州阻風孔家涵彷若登岸見草中馬臥極瘦血濡頸旁有語余曰彼昔同其主被難於此今其主人間已三十年彼在此伺其主同去時聞而惡之遂驚覺則恐不得久相見也繼視君則病勢益減以君寂寞甚日三四過視之又七八日病忽劇語不可辨數日遂卒旣絕氣余撫屍哭之復轉睛視余旣手足堅冷經日而腹溫不散余嘗被摩其膺尙格格作聲膚澤如生時無所惡則君之精慧信矣君考以嘉慶戊午卒於漢陽喪旣歸厝地不吉君嘗屬余改卜不果君旣卒思有以副君意遂爲卜兆於中雷塘之西南將遷君考並瘞焉君於學多所窺測而嗜詩爲甚草稿紛糾余刪輯之爲若干卷昔李觀與韓退之友善所以稱之備至今觀所傳詩稍清澈耳而退之亟稱之莫以爲過者則信乎其才難也余頗沛較退之爲甚而文行無似其言不足重君以取信於人然觀詩而傳也則君何疑焉君卒以嘉慶十二年四月七日年三十歲子復曾生六月而孤貌敦實當能伸君之志者五月廿一日涇包世臣清故揀選知縣道光辛巳舉人包君行狀

曾祖煥章字堯文國子監生鄉飲介賓

祖輯五字觀之縣學生 嘵贈文林郎侯官縣知縣

父良棻字重侯道光 登極恩詔賜級九品

安徽寧國府涇縣震山鄉十一都二圖包村二甲儒江蘇江寧府城北和會街包世榮年四十三狀

君字季懷姓包氏包氏祖漢大鴻臚曲阿咸鴻臚與子郎中福以魯詩論語爲明和二帝師宗始有望於周隋之際則東海愷榆昆弟並以漢書顯於唐則潤州融與二子何佶以詩任城文彥以書著聲開寶間於宋則合肥孝肅公尤知名涇之包氏宗合肥南宋乾道中忠五教授於涇因家焉然曲阿潤州皆今丹徒而丹徒族人顧宗合肥云孝肅有曾孫三長居涇次居貴池季居丹徒在貴池者則云自震山轉遷以涇爲宗吾宗譜則云教授爲孝肅嫡長曾孫然與宋史不符不審教授於孝肅世次何別也教授傳十有七世至明之季處士悠芳負販於和州歲暮將歸而聞鄰婦哭甚哀詢知以負債故賣妻遂罄貲代償歸告家人以生涯折閱而已順治中有和州人自九華山進香返過包村言其父母遺命必朝山爲包布客報德時處士君已病甚拜於床前乃前鬻妻者得留而生之子也其事乃聞於人處士再傳而至鄉賓君孤貧以析薪爲生而事節母孝友於兄接人信義以見重鄉邑本府長洲宋府君毅表其門曰雍睦流芳文林君爲鄉賓君長子始業儒有子五其叔則九品君於世臣爲三世父娶於翟生四子君爲其季君生始十月而世母病歿時予母育季妹有乳文林君命並撫焉稍長從文林君寢處五四食指羣從數十無升斗之仰年及童率四出覓食三世父貿易於江寧之南鄉爲予考府學君集村童世臣從而授館焉惟

二世父縣學君在家授讀侍文林君文林君愛君甚謂必成名不令習異業使就學縣學君然應門赴市無代者或至往返十餘里求質庫君故魯又不得專意几席以故年過成童中經尙未能成誦然試筆爲文時有奇氣矣嗣予攜君同游揚州與爲約曰吾年少不幸盜虛聲於斯世奔走食力給俯仰學無根柢而詞有枝葉常用自慚吾先世以經史立家法中葉衰遲吾弟沈銳能守寂寞修復先業其在茲乎期以十載勉之矣君對曰詩固先業也請學詩君謂毛公恪遵雅訓義最優簡質難曉故鄭氏時出別義以輔之非好學深思者莫能猝通或又以私意附會俚言破道至於草木鳥獸之性質體用詩人所由托興也又古人習於禮故舉時舉地舉器服卽以見得失寓美刺斯三者有一不明晰則茫然不得其解雷聲瞽說詩義幾晦爰托始於嘉慶戊辰以迄道光辛巳十有四年寒暑不輟成訓詁八卷草木二卷鳥獸一卷蟲魚一卷輿地一卷名曰學詩識小錄述吉凶典禮器服樂章者又十卷未有大名共二十二卷四十餘萬言識小錄十三卷中唯輿地一卷未經君自寫定述禮十卷則初稿數欲焚棄而幸存故笥者其貫穿馳騁分散探纂治通而不牴牾意逆而不穿鑿可以爲明述之雅儒者也然夸者則徒見爲耳目之廣採掇之勤而已君以治詩故於載籍無不蒐覽尤好苟卿屈原呂不韋太史公書班陳范三史杜氏通典司馬氏通鑑每歲必數過流覽文選及漢魏以來至近世詩文總集專集深通文法明於激射隱顯繁簡徐疾得失之故凡子有所著述必先示君君指摘疵類予應時改正十四五久久審之則君之所言無不當者蓋善論文辭亦莫君若也然自著詩文甚謐嘗謂覽近人纂作率未見其精善然自爲之則手不稱意隨俗操筆徒增來者訾議耳君性雖佚蕩然以廉隅自勵揚州四達之鄉士人爭銜鬻以徼名利君旅居

於是且二十年常閉戶不通人事遇績學敦行之先進則以弟子行自處於聞人華士蔑如也然善資友以自淑甘泉薛傳均子韻儀徵劉文淇孟瞻旌德姚配中仲虞族子慎言孟開四人者皆務實不近名博洽有文采君子之徒也與君志趣如一講貫至久故論交爲尤篤君又嗜書肆力率更而筆勢轉換則兼大令北海有蘊藉然常以闡入中岳爲歎君所嚴事者侍郎開化戴金溪先生爲其多聞而篤實以清操先天下也謂陽湖張琦翰風詩詞逸宕性毅直而與人可親謂吳沈欽韓文起強識雄文而學明統類誨人不倦足以息驕吝風惰廢皆執禮於師友之間於古文推陽湖惲敬子居爲百年巨手而謂仁和龔自珍定庵文情奧衍富齒淹聞造詣未可量於制義推盧龍蔣第次竹於書推懷甯鄧石如頑伯其次則諸城劉文清公讀高郵王念孫懷祖廣雅疏證嘆其精識過休寧戴氏唯憑脰爲疵謂宛平徐松星伯漢書西域傳補注爲絕倫諸城懷寧君皆不及見君之隨計也謂可見高郵面質疑義而年逾八十不能接後進矣君深用爲憾君年十九始應童子試八試始遇督學長洲徐公頤嘆君文沈麗爲八府五州所無拔府學第一然幕中士不能喻爭欲黜之及拆封知爲子弟乃大服徐公笑曰如此才固不愧爲慎伯弟然豈復藉兄以名哉應鄉試五道光紀年侍郎蕭山湯公金釗編修新建熊君遇泰主試無極劉君本夔爲許仲虞葬後卽歸姚氏童養之卿撫長子至六歲以屬仲虞撫次子至六歲以屬孟瞻爲吾教誨之必得成立卿尙不至焚老無依也其室人泣請留書爲託君曰孟瞻仲虞與吾爲道義交二十年非歧視生死

者是後遂不復有言以道光六年九月十八日疾革先是世父猶冀病勢有瘳及十五日夜聞異香滿室如是三夕竟不起適戚黨同里翟惟善楚珍自都返撫屍垂涕資其賻得以成殮予聞訃奔哭並從世父卜兆域於城東三十里玉屏山之麓將以七年春歸君之魄配王氏會稽望族習禮能安貧子二長士鐸甫三齡次士銓君卒八日而後晦君好學如是而不祿鯁背拊轉黃口扶苴禮堂之寫定未聞通邑之傳人難必生民至戚備於身後豈謂同產恩私實有志吾道者所共悼痛故續述行業以告君之執友及當世鉅儒錫銘誄以慰泉壤且使來學有所徵信則斯文之厚幸匪惟衰宗子姓沒齒不朽已也道光六年冬十月八日從父弟世臣欷淚謹狀

清故優貢生孫君墓誌銘

道光癸巳十月二十日福建舉人陳金城見訪再拜致其師孫君之遺命泣涕言曰嗚呼壬辰正月吾師過揚州得識先生金城實侍事如日昨及抵都則病歟轉成脚氣年始五十精力故未衰五月二十日竟爾奄忽吾師雄文不得於有司砥行名止閭巷著述數百卷未流布而旅喪七千里外斯亦學人之至戚也病亟命金城曰吾必不起吾隨舉主入都遂至於是命也夫然因舉主識安吳包君接其言論讀其書當代能任斯文之重者也而必乞埋石文於包君使吾名得附於世者則死不憾矣金城謹誌之茲以來春定舉葬奔赴喪事用敢將吾師之末命又曰金城侍吾師講論口授注疏未嘗檢本金城有查核不得者卽告以某卷某頁論六書檢許氏本示弟子舉手卽得其示其精熟如此然常言吾人治經非以矜淹洽爲他日之當治人也治人先自治不能自治徒治經何益質吾師生平可謂言行相顧者也其居父母

喪不飲酒食肉不居內者六年。泉俗好鬪訟。大姓爲甚。孫氏族衆萬數。漸漬身教。竟爲仁里所學如此。所遇如彼。非先生無足與發潛曜垂信來茲。而慰幽壤者。故敢以請。嗚呼。近世師弟相授受一利祿之途矣。豈必待死生哉。升沈豐約有不忍言者。今陳君以會師葬故犯霜雪跋涉萬里。而誦述行治本末尤詳備。有要其所受於師可知也。余旣感孫君自託之誠。又高陳君義。雖不任不可以辭。

系曰。君諱經。世字濟侯。別字惕齋。福建之惠安人。父至正邑庠生。通經工爲文。君學所自出也。道光庚寅。君應歲試。使者奇其文。詢所學。博辨切至。遂舉優行第一。貢入國子監。使者則今禮部侍郎浙江學政新。城陳公用光也。侍郎好善。甲流輩前自閩還都。艤舟咤余曰。吾歸裝得一孫濟侯。當敵筭河三百石矣。余因以識君。君所著有十三經正讀定本八十卷。春秋例辨八卷。爾雅音疏六卷。孝經說二卷。夏小正說一卷。釋文辨證十四卷。經傳釋詞續編八卷。說文會通十六卷。韻學溯源四卷。詩韻訂二卷。惕齋經說六卷。讀經校語四卷。其通經略一編。則纂集古今治術本於經術者。以明窮經致用之方。無慮數十卷。尙未成書。四書集解十二卷。周易本義發明十三卷。小學輯記。近思錄附注。性理輯義三書。無卷第。皆少作惕齋制義四卷。則陳君集錄家塾及課試者。妻某邑某氏。子某。某職。女子子某。適某。某職。葬某原。實某月某日。銘曰。昌黎謂衆萬之生。誰非天胡喜厚其所可薄。然往古著書以自見後世者。大都其居窮守約者也。得毋人世之所謂薄與厚者。與天錯耶。抑天之所以厚斯人者。不一途而各擇其所專託耶。造物之意。誰則知之。嗚呼。孫君又何悲矣。

與陳孝廉金城書

世臣白念庭足下辱枉顧荒寓是日張館陶櫓舟至揚世臣往哭丙夜方返足下相候自辰達戌洎得見又聞尊師孫君不祿增人悽惋館陶抱璞不剖老死風塵然雅儒名偏士林循吏績在輿誦年政七十孫君緣以諸生促壽旅次所遇尤艱是以雖傾蓋交而與館陶之道義固結三四十年者哀戚固不殊也足下稱孫君命以沒世之疾相屬孫君學業真所謂不假良史之辭卽足下萬里奔會師葬世臣有生所未聞見固由高誼絕俗非孫君何以致此此豈復鄙文所能輕重者重辱賢師弟見許之深不敢自藏固陋殫思誤作錄于另紙足下所述孫君世系行治著述甚備別後繹思仍有須面詢者次早走答而舟已遄發故並陳其所以恭肅公遠在趙宋若是孫氏始遷祖則宜詳其所自來因何隸籍若非始遷不符書例曾祖與祖俱有隱德未能切指事實則近常談故書系止及一代非故爲福也妻與子女女夫于例宜書足下談次未及故闕字以備補填至孫君著述大都宗漢則闡宋諸編自係初地故稍易其次第夫汎附固爲陋習而調和亦非真詮孫君書故未見然曾略聞緒論卽校子韻疏證數事其深於漢學可知由宋歸漢闡造詣淺深不必更加瞻顧爲調和之說也通經略一書最有裨於來學天下未嘗無有志之人大都爲師友所汨沒遂致稗販經史徒資弋獲人心世道日付頽波足下以高第弟子所望必竟盛業較復齋通解尤足毗輔名教也榮名無旣造物所以慰求志之勤然章布博文旣罕傳而盛者則尤罕良以枝葉單寒難成蔭實近世聞人唯侯魏身俱不達然有大力者負之以趨而體龐氣茶不足厭觀者之意甫及百年聲稱已減是其傳否正未可知况世臣少本不殖長更就蕪貨廩無五噲之謠握管無雌伏之歎自華自戒利名路隔而槐棘屏翰望風摧排以視侯魏情事相反而賢師弟以爲必能信今傳後久而益

光恐論者不以爲知言也。然世臣亦未敢自棄。每至臨文必慎所許。恆慮一字苟下。重誣後世。名山通邑。並聽之造物而已。流水不慚聊助一疎。陰寒累月伏唯爲道珍重千萬。十一月十日世臣謹白。

清故翰林院編修崇祀鄉賢姚君墓碑

道光辛卯安徵疆臣列君與君猶子故刑部郎中之行誼請祀鄉賢從人望也。次年冬部臣識覆以爲名實相副得報可時君之曾孫瑩宦游江蘇以君遺集援鶴堂筆記三十四卷古文集五卷詩集七卷鄉賢錄一卷餉世臣而屬文君之墓石郎中君世所稱惜抱先生而君則惜抱軒集中所稱學所自出之伯父薑塢先生也。憶世臣以嘉慶壬申謁惜抱先生於白門鍾山書院請爲學之要語及君者至再至三嗣讀古文辭類纂中載君論說數十百事披隙導窓辨正舛誤莫不持之有故則益欲求君書數年不可得茲得反覆之乃知君博覽強識不主家法唯以旁稽互證求一心之是爲詩文必達其意絕去依傍自成體勢居恒不著書而繙閱校勘至老不輟藏書數萬卷悉加朱墨見有錯謬羨脫隨手糾正各紀錄於簡端君旣卒書籍頗有散失惜抱先生收手蹟之僅存者藏之及瑩成立乃舉以相付瑩逐條編纂其有先後持論差互者悉仍其故今所版行之筆記胥是物也然君集有書史記六國表序後曰世變異則治法隨之故漢以後多踵秦法司馬氏援法後王之說以學者不道秦事爲耳食蓋深感世變而詭詞以寄痛則君蓋深有獲於古訓者非苟矜淹洽也固將有以用之迺覓舉至年四十一始通籍居詞館數年卽膺察典當外擢方而遽引疾去夫豈憇於世事哉繼讀君跋顏氏家訓曰交道繩結常爲禍福所倚伏文人志士於幕府權門貴判迹於首途避薰炙於始灼然則君之決退其亦有所不得已於中者也君旣歸里無

所用則相與率鄉人舉義倉條約甚設迄今幾百年踵其法而擴之以故邑屢饑而不害是亦爲政君斯有所見端矣讀君之書可爲學者稽古法迹君勇退無濡滯可爲學者涉世法推君之任卹鄉黨可爲學者入居里族出拊閭閻法則君之所以不朽固不係墓石之有無而稱述先達流風餘韻以諷諭方來斯固後死者所有責也爰次其世家而系之曰

君姓姚氏諱範字南青寢塢其號也世爲安徽桐城人曾祖諱文然康熙中官刑部尙書謚端恪雍正中特旨賜專祠祀於其邑祖諱士基湖北羅田縣知縣民思其政祀之於名宦祠父諱孔瑛早世贈翰林院編修君以康熙壬午八月十八日生戊戌補縣學生員雍正乙卯選拔貢太學舉乾隆丙辰順天鄉試第二人中式壬戌會試第三人成二甲進士改庶吉士甲子充順天鄉試同考官乙丑散館授編修充武英殿經史館校刊官兼三禮館纂修官丁內艱服闋起原官兼文獻通考館纂修官庚午京察一等既引見以病自免解組後教授南北閱二十有一年辛卯正月初八日卒於家君卒逾六十年鄉人追慕教思顱請入祠而傳學之惜抱先生實侍君入一門四世先後以政事文學享國家俎豆肸蠁之報史氏所謂榮名豈有旣者耶

清故文學汪君之碑

道光八年十二月十日儀徵縣學生汪君穀卒其同志友丹徒汪沅芷生甘泉薛傳均子韻儀徵劉文淇孟瞻寶應劉寶楠楚楨涇包慎言孟開旌德姚配中仲虞儀徵王僧保西御江都梅植之蘊生丹徒柳興宗賓叔甘泉楊亮季子儀徵吳廷颺熙載王翼鳳勾生旣各爲文辭以紀其學行寫其悲哀又共琢石表

其墓而涇包世臣以丹書之曰君質脆弱而性和易居家藹如也接人退然如不及唯力學則精銳強悍進而不止至不欲後古人弱冠卽鄙棄俗學委心許鄭集殘缺以求會通有齟齬不相入者則旁稽博討鉤深洞贊常達旦不寐又以擘經擘史要領多在輿地故記簡質後儒各爲歧說紛出無依據唯近世之圖精審據以爲本比羣籍而究事情口指手畫必得顯證而後已尤嗜作書約鍾梁分法爲眞行風發蹈厲有不可控勒之勢而逾麗一應楷則積勞致咯血且病且學蓋君之沒也年止三十有五而病已八載然未嘗旬日輟學也君字小城系出唐越國公世居歙明之季有國儒者遷揚五傳至君考鋒始著籍儀徵舉於鄉以知縣就銓初娶吳氏生長子補繼娶楊氏生君及和秦程君娶於母黨生一女而歿君葬之西郊金匱山君甚愛其女孟瞻有子毓崧岐秀善讀書君雅屬意孟瞻故知之及君之亟也告和求爲其子婦君聞而笑曰孟瞻厚我憐我而及我女耶君無主後補以其幼子寅壽後君並卜明年月日以君喪合於夫人之窆自予弟世榮季懷從洪沂州遊於梅花講院因得與君及芷生諸君交善其日相砥礪勵勉者不爲人不速化本本原原不以得喪變所習予嘗以謂季懷所與遊諸君家居相距或數百千里是蓋江淮英淑之所發越使得萃於一地相輔以有成夫豈事之適然者耶然十數年間諸君旣皆困蹠無善狀季懷顧不幸奄然物化而君又爲之續生材實難受材而不負其生爲尤難而奪之遽而且酷至於如是天道其果可知也耶然季懷身後諸君檢校遺書至四十餘萬言庶幾雅密有條理唯君造詣已深而著述未就無以垂示來茲尤可悼痛是宜有銘銘曰

嗚呼小城以子守身之謹而不能厚其生以子稽古之勤而未逮樂所學之成宜博辨雄文如諸君者不

勝哀慕涕隕而心傾也悲夫。

清故國子監生凌君墓表

江都有生於孤露不假師資自力學以成名者二人曰拔貢生汪中容甫國子生凌曙曉樓予以嘉慶六年遊揚州則汪君前卒及十年再至乃識凌君君生貧而居市十歲就塾年餘讀四子書未畢卽去香作雜傭保然停作輒默誦所已讀書苦不明詁解鄰之富人爲子弟延經義師君乘夜狃其軒外聽講論數月其師覺之乃閉外戶不納君君憤甚求得已離句之舊籍於市私讀之達旦而日中傭作如故年二十乃棄舊業集童子爲塾師稍稍近士人然或僂陋不足當君意故君學爲世俗制舉文無尺度同人亦莫肯爲言者而童子嘗從君遊則書必熟作字正楷以故信從衆脩脯入稍多益市書君有甥儀徵優貢生劉文淇少貧如君君愛其穎悟不忍棄之逐末自課之且教且學劉君齒未壯卽以淹通經史知名江淮間而其學實自君出君初識予問所當治業予曰治經必守家法專治一家以立其基則諸家可漸通然心之爲用苦則機室樂則慧生機室者常不卒其業凡讀書不熟則心以爲苦君自取熟者治之可也以君熟於禮遂勸君治鄭氏又以古注義皆激射回互非深通文法則蒼黃不能得情事因勸君先誦嘉隆經義三十首每首以三百過爲度君旣習之得體勢乃出故編修武進張惠言所輯四子書漢說數十事及予與庶常陽湖李兆洛增綴未就之稿授君以爲治經式君旣明古人文法隱顯疾徐之故益樂益憤歲餘稽典禮考故訓補其不備爲四書典故覈六卷以見知於故梅花山長沂州知府歙洪梧君旣治鄭氏得要領又從今寧國訓導吳沈欽韓問疑義益貫串精審嗣聞今儀制武進劉逢祿論何氏春秋而好

之及入都爲雲貴總督儀徵阮芸臺校輯經郛盡見魏晉來諸家春秋說深念春秋之義存於公羊而公羊之學傳自董子董子春秋繁露原天以尊禮援比以貫類旨奧詞頤莫得其會通乃博稽旁討承意儀志梳其章櫛其句爲注十七卷又別爲公羊禮疏十一卷公羊禮說一卷公羊問答二卷嗣阮公出鎮延君入粵課公子君時方家居讀禮以喪服爲人倫大經後儒舛議是非頗謬作禮論百篇引伸鄭義泊至粵與阮公商榷刪合爲三十九篇爲一卷凡君所著書三十八卷五十餘萬言皆有顯證遠雷同附會之陋足爲求學先路君娶同邑范無出別宅嚴舉子鋪而范尋砌君繼患風痺養疴於董子祠之南偏道院遂以道光九年五月廿六日卒於寓廬年五十有五鋪雖始斂哀慕如成人劉君卜以是年八月八日祔君於雙墩北原之祖墓與范合封又圖所以不朽君者以屬予予謂汪君雖博覽強記而特工文辭鉅公推挽者多晚以饒裕然勤學亦稍殺減矣君獨尙樸學南北奔走皆以校書授讀爲事未嘗與斯世通蓋雁脩脯而外未嘗入可以無取之財予每過從君必危坐據案左手繙卷冊右手持筆客至前而不見蓋自縊交以來廿餘年如一日君得於天者後汪君而人力堅緻終始不渝則殆於過之是不可以不銘銘曰凌氏之先泰州著籍儒歷僉憲明史稱直曾祖曰襄武長千夫祖鸞父鰲乃寄江都君寢且魯好學根性自知讀書不羈而正古有都養抑聞牧猪十五年所其精不逋吁嗟凌君遠與爲儕名則旣振福迺不皆抉經之心以一何鄭排斥詖辭章明先訓粵有慶允泣抱遺書修德必報成此藐諸

清故文學薛君之碑

道光九年八月二十日甘泉薛君子韻殉於福建督學使者內閣學士新建陳用光汀州校士行署先是

陳公讀子韻所著說文答問疏證之書而善之。以質太子少保閩浙總督金匱孫爾準。孫公故小學家也。嘆爲絕倫。議相與板行之。以嘉惠閩士。猝遭此變。陳公慎於殯之禮。留疏證六卷稿本。而遣使護喪歸揚州。厚資其葬。儀徵劉文淇孟瞻檢遺篋。得舊讀十三經本集錄。其丹黃手勘之語。約可廿卷。閩游草一卷。文選古字通疏義十二卷。草創未卒業。孟瞻與寶應劉寶楠楚楨。子族子孟開。約纂輯繕副。以付其家。其家卜明年春祔於甘泉西郊十三里廟陶家沖祖墓。同人以子韻道贏時紳不可不表也。以屬予。予以謂子韻少工駢文。矞麗常冠儕輩。嗣與孟瞻及子弟季懷友善。因以次締交於孟開仲虞五人者。相結爲本原之學。季懷孟瞻孟開治詩。攻毛鄭氏。仲虞治易。攻鄭虞氏。子韻治小學。攻許氏。皆旁通羣籍。而據所業爲本。砥礪以有成。近世昌許氏者。推嘉定錢氏。金壇段氏。段氏徒衆尤盛。唯子韻究其得失。而右錢氏。錢段皆予舊識。備聞二老面商。推之辭知。子韻於斯業甚審也。乾隆中大興朱氏。首以許鄭之學。勸天下一變。揣摩塵腐之習。繼聲者務名高而不別真僞。則擣撘斷爛之弊興。於是求士者反其道以爲用。或揣摩塵腐之未能也。然遂衰衰躋清要。爭言主持風會矣。四十年間風尚三變。故學者能有志於古百之一志古而一再不當於有司。輒自疑遷業。其能堅定不惑。以迄有成者。又百之一。予弱冠展側江淮間。常自病盜虛聲。無根柢。物色樸學。得陽湖黃乙生。小仲通鄭氏。禮行不違其言。武進劉逢祿。申受通何氏。春秋虞氏。易雖情鍾勢曜。而讀書如有嗜好。江都凌曙。曉樓治何氏。春秋鄭氏。禮困學而不厭。同邑胡世琦。玉樞墨守鄭氏。有綴殘補缺之勤。嘉定潘鴻誥。望之能錯綜許鄭。以適大義。丹徒柳興宗。賓叔治詩禮史漢。能依雅訓。以捍俗說。楚楨之上世。故崇漢學。能不墜其家法。儀徵汪穀。小城覃精許鄭。尤長於輿地。夥俞正

變理初通鄭氏禮杜氏春秋烏程凌望厚堂綜漢義說易禮春秋數十萬言興理初並長推步算術蓋吳越英雋略備於斯已然必守許氏以推原賈馬鄭服詁訓者卒莫如子韻之善荀子曰學不可以已鏤而不舍金石可鏤非必資性殊絕也故曰古之學者爲己志乎古必違乎今無望其速成無誘於勢利迺斬至乎古之人然而太史讀功令至於廢書而嘆者不亦深悼鬱滯矣迹諸君子所學此其志豈利祿之路哉要其稽古自得皆足以有見於時而成進士居館職者唯玉樵申受未幾玉樵竟出宰不獲乎上申受左遷祠部至十三年不得調理初望之季懷獲一解連躡春官憂生之計更迫餘子則困諸生無所合而自道光紀年以後小仲嗒然物化季懷小城相繼奄忽今年春夏之交玉樵家食不祿曉樓以養疴歟於道院入秋而申受疫沒京邸子韻旅喪閩館右軍所謂感兼傷痛切心哀窮不已又云當今人物眇然彫落可哀嘆者殆猶未至若斯之摧剝酸酷也爰洒涕而系之曰

君年卅一諱傳均舊隸溧水今邗濱遷邗再傳璋璉琇璉次子柄君其胄以柄後璋璋有孫孫知好學祖顏溫母李早世繼楊慈妻何淑慎君宜之維君失聯以學顯吁嗟中材何以勉孝釗總角抱遺書君子之澤自茲遠

皇敕授修職郎安徽寧國縣學訓導沈君行狀

曾祖彬 姦仲氏

考培宗馳贈修職郎 姦馬氏馳封儒人

江蘇吳縣木瀆鎮沈欽韓年五十七狀

君字文起號小宛其族望吳興分吳江遷郡城再遷木瀆爲吳縣人至君六世君深眉鉅目仰鼻而短脰面麻黑頑腹下垂行步蹇遲語言澀呐年逾三十乃得以縣學生員就嘉慶丁卯江寧布政使司試領薦赴春官又輒躡丁丑大挑入二等道光壬午選授安徽寧國縣學訓導庚寅九月奉馬孺人諱歸里次年十二月廿日卒於家配同邑王氏子三箕衍不勝喪後君一月以壬辰正月廿日歿有孫懋官次瓜衍天衍皆業儒君質亞生知而力同因學幼侍貽贈君習爲詩稍長自程誦讀家極貧書值千錢輒無力購致假之藏書家莫肯出全部得數冊持歸計日繳換然必求要領寫爲要刪淹通羣經尤長禮與春秋肇擎諸史尤熟於志旁及百家故記官書野乘古今專集彙集類鈔劄記究其條緒悉歸於統旣弱冠念漢書至深至博顏注旣淺陋復多盜竊范氏後書雖簡略而義存實錄章懷雜集衆手故有粹駁劉氏注司馬八志文殊宏富然頗無統貫尤疎於地理乃覃思廿年遠搜故籍爲兩漢書疏證七十四卷率藁書四十頁貞率八九百言共二百餘萬言於以正謬補闕盡之矣凡以植國之體端由制度漢氏雖近古然離秦立法爲後世濫觴君故上推姬周下比有明詳哉乎其言之損益悉陳得失備見使來學有所依據以當後王取法者旣成寓東於余曰此書發蒙啓覆鉤稽貫串然親見其成書或加省覽曾莫能終一卷覆瓿之歎何待來茲良玉不剖必有泣血以相明者非足下而誰蓋君之自信而遂以信余也余與君皆業荀子嘗推論爲國以禮之指以爲孔子悼時人悖亂廢禮當使天下嬰毒禍無可旣極乃見意於春秋以誥萬世君因謂左氏親承聖訓博驗寶書依經立傳全付託之重而公穀家攻之欲顯復晦杜氏注出雖

得列學官然多入以邪說陰敗禮教其蠹左氏也逾於明攻余涉左氏淺聞君言未深喻也及君郵示補注十二卷正杜氏之大失其有略陋並爲補綴別爲考異十卷以闢百家淆亂則信乎從訟左規杜之後而加詳審者也君又以裴氏注三國志意在補其櫬脫光耀沈落而郡縣鎮戍之僅見一時名物訓詁之不類後世者皆闕故爲補訓詁八卷釋地理九卷又以地理之學古書唯存酈氏水經註近人戴東原校定其倒置羨脫趙誠夫爲之刊誤其書乃漸可讀而戴氏短在憑臆趙氏蔽於輕信至如古書之有足互證與近今志乘之目驗可據者二家又皆蒐討未逮也故爲水經注疏證四十卷然後郡縣之廢置沿革山川之高深變遷流合派分昔通今塞皆如提挈在手指掌可談又以一代鉅公詩文非曉然其朝章事實則不能得作者用心之所至韓退之王介甫兩集於唐宋各立其極而宋人註韓集空疏臆測宋人注王集止及其詩雖云贍博其於人物制度闕略尚多故補註韓集及王詩而別創王氏文集注共四十四卷又注范石湖集以著南宋之事然後唐宋五六百年之鉅製短章義皆可通君深造真積樂逢其原陳祥道禮書王施查三家蘇詩注王祀金石萃編疵謬觸目隨手糾正各成卷帙凡君著述無慮四五百萬言皆出稽古心得求是於實無一語任意矜眩里誤來學者雖云注釋實可單行唯未習算術常自引以爲憾君手繕古書至夥唯所節錄太平御覽雲笈七籤法苑珠林共若干卷校原書十存二三而菁華悉萃手稿尙存其幼學堂詩集十七卷文集八卷已版行君詩始則導源魏晉晚乃頽然自放然而屬詞比事必有所處嗜爲俳文才多而不受其患深究三史行文離合之故以故氣骨騁舉脈絡微至其聲窅然而沈其色黝然而幽爲自來駢儷家所未有後更爲散文健入震出盡破唐宋壁壘而自合短縷一可爲

後世法君性至和易不以所業驕人有問者必就其端緒原始要終反覆推尋使皆洞徹唯少小頗專口腹遊處有不暇擇者漸來久要之責又遇僕隸過谿刻相與造齋語肆謗訕嘗一至秦中遊裝稍潤有華服數事交遊復共掎摭之雖非大失唯余亦不能爲君曲諱也余生平言學推君論文則晉卿庚寅夏自刪定舊作爲三十卷初寫出而晉卿物化今年秋攜稿本訪君於木瀆入門則君奄在殯宮矣嗚呼哀哉原夫居下以思往其言有文始於詩盛於春秋秦漢作者遞相祖述幸得垂諭方來莫不珍同鴻寶功力羸艱殆難強名李唐以還著述滋廣衡其得失乃有可言杜氏撰集通典蔚爲政書之首然前承劉秩後錄國故搜討尙易宋世不刊之書唯涑水資治通鑑然亦借助羣材非一人心力所及章氏考索馬氏通考則俱以獨力成大業然依類探纂事有循持而舛誤亦復時見近世學者首推亭林顧氏述其成書郡國利病宅京記不過摭拾之勤肇域志雖未見要亦其類也唐韻正五書功同鐫金而學止一孔唯日知錄閏深簡切足副其守先待後之志而間出么小考證仍不免帖括末技顧宛溪胡朏明齊次風覃精水地優義居多顧復初窮究春秋分合著績專家成名於斯爲盛與君並世則錢曉徵實能窮探羣籍刊落疏通大都精當然片詞碎義其細已甚君博聞兼綜同符顧錢以言識大雖略後亭林而精則過之又文采鴻曜非二君自完邊幅者比學問之道務多無龐雜無紀而非所以語於吾沈君也君名故籍甚而妻菲尤盛余薄植無可指數因躡更甚於君疏附禦侮非其任矣竊述所知爲狀寫付瓜衍天衍錄副二本一以告君一編君集之末使君學大昌之後知君所謂真知之者唯包慎伯之言之非妄歎也道光十有二年歲在壬辰冬十一月十三日安吳包世臣謹狀

翟秀才傳

秀才諱翬，字儀仲，姓翟氏，吾涇之水東人也。本河陽張氏，遠祖有爲漢王大將者，漢滅，其子自鄱陽避難至水東，依翟氏以居，冒其姓。支裔繁衍，而真翟氏顧衰弱，今別爲老翟家云。秀才貌癯而善病，沈思寡言，慎交遊。與先子特善。乾隆丙午，先子始肆力爲詩。戊申冬，先子與秀才同爲吳氏客，出詩百餘首，屬秀才點定。秀才嘆絕，亦錄其五七言尤善者十餘首，以質先子。始相引爲道義交。己酉世臣侍先子至郡應科試，始得謁。壬子先子病痔甚，挈世臣自白門歸里。而秀才已以是年先期謝世，年四十一歲。無子。癸丑世臣求藥物於水東，因過秀才墓，作詩曰：忽忽過荒墓，長懷翟秀才。神期乍譚笑，文采竟蒿萊。寒谷泉空咽，衰楊葉自摧。誰憐霜草宿，蕭颯北風來。世臣返爲先子言：秀才墓荒涼狀，並誦詩。先子唏噓不自勝。久之，問曰：兒詩大似儀仲，何以能此？不肖言自八九歲侍几席，常課畢，輒自讀文選，嗣大人從戴氏假得全唐詩，不肖繙閱之，常徹夜。心有所觸，輒效爲之，稿累五六百首。大人病，不敢以請。先子曰：吾事詩晚，又苦腹儉，不足稱其意。兒能終吾業者，異日當以此致大名。洎先子棄養，不肖負米蓬轉，秀才自錄詩稿，竟遺失。近唯記其病鶴曰：洒落凌霄翰，蒼苔緩步行。窮愁但有骨，江海豈無情。露下寒生警，松陰影獨鳴。寰籠伏贊爾，得意尚縱橫。歸燕曰：歸燕歸何處，高秋影漸稀。慕儔非盡室，舍舊獨知幾。翠幙涼風冷，銀塘白露晞。存身深閉戶，還復候時飛。吾涇在唐有萬巨者，太白贈詩云：吾愛萬夫子，解渴同瓊樹。何日一來遊，相歎詠佳句。是必工詩，然片字無存。唯許棠列於大歷十子，全唐詩錄其五律二章耳。閱宋及今千餘年，未聞有知名士在人口耳者。先達侍御趙星閣先生，先子之業師也。嗜爲詩，自刻其各體詩二千餘首，爲漱芳。

居詩鈔亦以五律爲最工其渾厚過秀才則居使之然而完善精到殊不及工力固不可諱也胡玉樵世琦庶常亦嗜詩前在都下曾出其稿本各體千餘首見示夜郎自大非求益者才氣固可造而未就軌範非秀才比也然近人爲詩者日益多又未見有能及庶常者才難之嘆豈唯吾鄉秀才故蓄一端硯誤碎於地因仿毛穎爲端硯傳以自况文多不能記不審其族尚有傳本否世臣蹉跎至年七十日內自編前後論文之書因補爲此傳使訪詩于吾涇者知許君之有繼聲也

論書一

述書上

乾隆己酉之歲余年已十五家無藏帖習時俗應試書十年下筆尙不能平直以書拙聞於鄉里族曾祖槐植三獨達世尙學唐碑余從問筆法授以書法通解四冊其書首重執筆遂仿其所圖提肘撥鐙七字之勢肘旣虛懸氣急手戰不能成字乃倒管循几習之雖誦讀時不間寢則植指以畫席至甲寅手乃漸定而筆終稚鈍迺學懷素草書千文欲以變其舊習三年無所得遂棄去嘉慶己未冬見邑人翟金蘭同甫作書而善之記其筆勢問當何業同甫授以東坡西湖詩帖曰學此以肥爲主肥易掩醜也余用其言習兩月書逼似同甫明年春從商邱陳懋本季馴假古帖十餘種其尤者爲南唐楊畫贊洛神大觀揚神龍蘭亭余已悉同甫之法乃自求之於古以硬黃摹蘭亭數十過更以朱界九宮移其字每日習四字每字連書百數轉鋒布勢必盡合於本乃已百日拓蘭亭字畢乃見古人抽豪出入序畫先後與近人迥殊遂以蘭亭法求畫贊洛神仿之又百日乃見趙宋以後書樞急便側少士君子之風余旣心儀逾麗之旨

知點畫細如絲髮皆須全身力到始歎前此十年學成提肘不爲虛費也續縱游江浙徧觀收藏家舊跡壬戌秋晤陽湖錢伯坰魯斯魯斯書名籍甚嘗語余曰古人用兔毫故書有中線今用羊毫其精者乃成雙鈎吾耽此垂五十年纔什得三四耳余答言書不能佳然下筆輒成雙鈎魯斯使面作之畫旁皆聚墨成線如界余以此差自信矣是年又受法於懷寧鄧石如頑伯曰字畫疏處可以走馬密處不使透風常計白以當黑奇趣乃出以其說驗六朝人書則悉合然余書得自簡牘頗傷婉麗甲子遂專習歐顏碑版以壯其勢而寬其氣丙寅秋獲南宋庫裝廟堂碑及棗版閣帖冥心探索見永興書源於大令又深明大令與右軍異法嘗論右軍真行草法皆出漢分深入中郎大令真行草法導源秦篆妙接丞相梁武王河之謗唐文餓隸之譏既屬夢囉而米老右軍中含大令外拓之說適得其反銳精仿習一年之後畫有中線矣每以熟紙作書則其墨皆由兩邊漸燥至中一線細如絲髮墨光晶瑩異常紙背狀如鍼畫自謂於書道頗盡其祕乙亥夏與陽湖黃乙生小仲同客揚州小仲攻書較余更力年亦較深小仲謂余書解側勢而未得其要余病小仲時出側筆小仲猶以未盡側爲憾相處三月朝夕辨證不相下因詰其筆法小仲曰書之道妙在左右有牝牡相得之致一字一畫之工拙不計也余學漢分而悟其法以觀晉唐真行無不合者其要在執筆食指須高鉤大指加食指中指之間使食指如鵝頭昂曲者中指內鉤小指貼名指外拒如鵝之兩掌撥水者故右軍愛鵝玩其兩掌行水之勢也大令亦云飛鳥以爪畫地此最善狀指勢已是故執筆欲其近布指欲其疎吾子其祕之子書得晉人面目耳隨人言下轉不數十年化爲糞壤今人攻書至力者無如吾子勉之矣又云唐以前書皆始良終坤余初聞不知

爲何語。服念彌旬差有所省。因遷習其法。一年漸熟。丙子秋。晤武進朱昂之青立。其言曰。作書須筆筆斷而後起。吾子書環轉處頗無斷勢。又晤秀水王良士仲瞿。言其內子金禮瀛夢神授筆法。管須向左逼後。稍僵。若指鼻準者。鋒乃得中。又晤吳江吳育山子。其言曰。吾子書專用筆尖直下。以墨裹鋒。不假力於副毫。自以爲藏鋒內轉。祇形薄怯。凡下筆須使筆毫平鋪紙上。乃四面圓足。此少溫篆法。書家真祕密語也。余旣服小仲之言。因不敢遽以三君子爲非。分習而互試之。乃見其說足以補小仲之所未及。於是執筆宗小仲。而輔以仲瞿。運鋒用山子。而兼及青立。結字宗頑伯。以合於小仲。屏去模仿。專求古人逆入平出之勢。要以十稔。或有心手相得之境。然余非聞植三之言。則不學。非聞同甫之言。則中廢。非得小仲之傳。則僂僂畢世矣。余他業屢遷。唯好書廿餘年不改。一藝之能。其難如此。况進於書者乎。

嘉慶丁丑。余與翰風同滯都下。以書相切磋。簡札往返無虛日。旣乃集前後所言。掇其要爲此篇。又爲中篇以疏之。是年九月出都。道中得王侍中書訣石本。有云。首務執筆中控前衝。拇指左食右名禁。後從細心體味。蓋以五指分布管之四面。卽同此法。古人文簡不易推測耳。戊寅客吳門。乃爲下篇。以悉書之始卒。以示宜興吳德旋仲倫。仲倫亦歎絕而申之曰。道固歸於墨。不溢出於筆。而學之則自墨溢出。於筆始已。卯又與翰風同客濟南。得北朝碑版甚夥。因又爲歷下筆談。翰風故攻書。改用此法。以習北體。觀者每謂與余書不辨。然余書尙緩。而翰風尙峻。微立異同。述書筆譚稿出錄副者多。江都梅植之蘊生。儀徵吳廷闕熙載。甘泉楊亮季子。高淳黃洵脩存。餘姚毛長齡。仰蘇旌德姚配中。仲虞松桃楊承汪揭之。皆得其法。所作時與余相亂。然道光辛巳。余過常州。晤小仲。出稿相質。小仲曰。用筆者天書。中

盡之始良終乾。正所謂流美者地。書中闡發善矣。然非吾意。請其術。卒不肯言。

述書中

余旣述諸君子之言爲書。因以己意通之。而知其悉合於古也。右軍以管爲將軍。明書道之機樞在管。而管之不可亂動也。今小仲之法。引食指加大指之上。置管於食指中節之端。以上節斜鉤之。大指以指尖對中指中節拒之。則管當食指節灣。安如置牀。大指之骨外突。抑管以向右。食指之骨橫逼。挺管以向左。則管定。然後中指以尖鉤其陽。名指以爪肉之際距其陰。小指以上節之骨貼名指之端。五指疏布。各盡其力。則形如握卵。而筆鋒始得隨指環轉。如士卒之從旌麾矣。此古人所謂雙鉤者也。東坡有言。執筆無定法。要使虛而寬。善言此意已。仲瞿之法。使管向左迤後。稍偃者。取逆勢也。蓋筆後偃。則虎口側向左腕。乃平而覆下。如懸。於是名指之筋。環肘骨以及肩。背大指之筋。環臂灣以及胸脅。凡人引弓舉重。筋必反紐。乃長勁得力。古人傳訣。所爲著懸腕也。唐寶狀撥鐙之勢云。如人並乘鐙。不相犯。蓋善乘者。脚尖踏鐙。必內鉤。足大指著鐙。腿筋皆反紐。是以並乘而鐙不相犯。此真工爲形似者矣。至古之所謂實指虛掌者。謂五指皆貼管爲實。其小指實貼名指空中用力。令到指端。非緊握之說也。握之太緊。力止在管用。而不注毫端。其書必拋筋露骨。枯而且弱。永叔所謂使指運而腕不知。殆解此已。筆旣左偃。而中指力鉤。則小指易於入掌。故以虛掌爲難。明小指助名指揭筆。尤宜用力也。大凡名指之力。可與大指等者。則其書未有不工者也。然名指如椀之拒帆。而小指如椀點之助椀。故必小指得勁。而名指之力。乃實耳。山子之法。以筆毫平鋪紙上。與小仲始良終乾之說同。然非用仲瞿之法。則不能致此也。蓋筆向左迤後。稍偃。是筆

尖著紙卽逆而毫不得不平鋪於紙上矣。石工鐫字畫右行者其鋒必向左驗而類之則紙猶石也。筆猶鑄也。指如搥也是故仲瞿之法足以盡側勒策三勢之妙而弩趯掠啄磔五勢入鋒之始皆宜用之。鋒旣著紙卽宜轉換於畫下行者管轉向上畫上行者管轉向下畫左行者管轉向右是以指得勢而鋒得力。惟小正書畫形旣促未及換筆而畫已成非至精熟難期合法故自柳少師以後遂無復能工此藝者也。始艮終乾者非指全字乃一筆中自備八方也。後人作書皆仰筆尖鋒鋒尖處巽也。筆仰則鋒在畫之陽其陰不過副毫濡墨以成畫形故至坤則鋒止佳者僅能完一面耳。惟管定而鋒轉則逆入平出而畫之八面無非毫力所達乃後積畫成字聚字成篇過庭有言一筆成一字之規一字乃通篇之準者謂此也。蓋人之腕本側倚於几任其勢則筆端仰左尖成尖鋒鋒旣尖則墨之所到多筆鋒所未到是過庭所譏任筆爲體聚墨成形者已以上所述凡皆以求墨之不溢出於筆也。青立之所謂筆必斷而後起者卽無轉不折之說也。蓋行草之筆多環轉若信筆爲之則轉卸皆成扁鋒故須暗中取勢換轉筆心也。小仲所以憾未能盡側者謂筆鋒平鋪則畫滿如側非尙真側也。漢人分法無不平滿中郎見刷牆塗痕而作飛白以塗帝鋒平刷痕滿足因悟書勢此可意推矣。古碑皆直牆平底當時工匠知書用刀必正下以傳筆法後世書學旣湮石工皆用刀尖斜入雖有晉唐真跡一經上石悉成尖鋒令人不復可見始艮終乾之妙故欲見古人面目斷不可舍斷碑而求彙帖已余見六朝碑拓行處皆留留處皆行凡橫直平過之處行處也古人必逐步頓挫不使率然徑去是行處皆留也轉折挑剔之處留處也古人必提鋒暗轉不肯擗筆使墨旁出是留處皆行也頑伯計白當黑之論卽小仲左右如牝牡相得之意小仲嘗言近世書鮮

不閩牆操戈者。又言正書惟太傅賀捷表右軍旦極寒大令十三行是真蹟其結構天成下此則張猛龍足繼大令龍藏寺足繼右軍皆於平正通達之中迷離變化不可思議余爲申之以刁遵志足繼太傅河南聖教序記其書右行從左玩至右則字字相迎從右看至左則筆筆相背噫知此斯可與言書矣

述書下

書藝始於指法終於行間前二篇已詳論之然聚字成篇積畫成字故畫有八法唐韓方明謂八法起於隸字之始傳於崔子玉歷鍾王以至永禪師者古今學書之機括也隸字卽今真書八法者點爲側平橫爲勒直爲努鉤爲趯仰橫爲策長撇爲掠短撇爲啄捺爲磔也以永字八畫而備八藝故用爲式唐以後多申明八法之書然詳言者或不得其要領約言之又不欲盡泄其祕余故顯言之夫作點勢在篆皆圓筆在分皆平筆旣變爲隸圓平之筆體勢不相入故示其法曰側也平橫爲勒者言作平橫必勒其筆逆鋒落紙卷毫右行緩去急迴蓋勒字之義強抑力制愈收愈緊又分書橫畫多不收鋒云勒者示隸畫之必收也後人爲橫畫順筆平過失其法矣直爲努者謂作直畫必筆管逆向上筆尖亦逆向上平鋒著紙盡力下行有引弩兩端皆逆之勢故名努也鉤爲趯者如人之趯脚其力初不在脚猝然引起而全力遂注脚尖故鉤末斷不可作飄勢挫鋒有失趯之義也仰畫爲策者如以策策馬用力在策本得力在策末著馬卽起也後人作仰橫多尖鋒上拂是策末未著馬也又有順壓不復仰卷者是策旣著馬而末不起其策不警也長撇爲掠者謂用努法下引左行而展筆如掠後人撇端多尖顎斜拂是當展而反斂非掠之義故其字飄浮無力也短撇爲啄者如鳥之啄物銳而且速亦言其畫行以漸而削如鳥啄也捺爲磔

者勒筆右行鋪平筆鋒盡力開散而急發也後人或尙蘭葉之勢波盡處猶嫋娜再三斯可笑矣字有九宮九宮者每字爲方格外界極肥格內用細畫界一井字以均布其點畫也凡字無論疎密斜正必有精神挽結之處是爲字之中宮然中宮有在實畫有在虛白必審其字之精神所注而安置於格內之中宮然後以其字之頭目手足分布於旁之八宮則隨其長短虛實而上下左右皆相得矣每三行相並至九字又爲大九宮其中一字卽爲中宮必須統攝上下四旁之八字而八字皆有拱揖朝向之勢逐字移看大小兩中宮皆得圓滿則俯仰映帶奇趣橫出已九宮之說始見於宋蓋以尺寸算字專爲移縮古帖而說不知求條理於本字故自宋以來書家未有能合九宮者也兩晉真書碑版不傳於世余以所見北魏南梁之碑數十百種悉心參悟而得大小兩九宮之法上推之周秦漢魏兩晉篆分碑版存於世者則莫不合於此其爲鍾王專力可知也世所行賀捷黃庭畫贊洛神等帖皆無橫格然每字布勢奇縱周緻實合通篇而爲大九宮如三代鐘鼎文字其行書如蘭亭玉潤白騎追尋遠遠吳興外出等帖魚龍百變而按以矩矱不差累黍降及唐賢自知才力不及古人故行書碑版皆有橫格就中九宮之學徐會稽李北海張郎中三家爲尤密傳書俱在潛精按驗信其不謬也然而畫法字法本於筆成於墨則墨法尤書藝一大關鍵已筆實則墨沈筆飄則墨浮凡墨色奕然出於紙上瑩然作紫碧色者皆不足與言書必黝然以黑色平紙面諦視之紙墨相接之處彷彿有毛畫內之墨中邊相等而幽光若水紋徐漾於波發之間乃爲得之蓋墨到處皆有筆筆墨相稱筆鋒著紙水卽下注而筆力足以攝墨不使旁溢故墨精皆在紙內不必眞跡卽玩石本亦可辨其墨法之得否耳嘗見有得筆法而不得墨者矣未有得墨法而不由於

用筆者也。丞相云下筆如鷹鵠搏擊。右軍云每作一點畫皆懸管掉之。令其鋒開自然適麗。侍中云崔杜鍾張二衛之書筆力驚絕。梁武帝與隱居評書以中郎爲筆勢洞達。右軍爲字勢雄強。又取象於龍威虎震。快馬入陣。合觀諸論。則古人蓋未有不尚峻勁者矣。永師之後。虞歐褚陸徐張李田顏柳各奮才智。暢宗旨。中更喪亂。傳筆法者唯明州布衣范的。洛陽少師兩家。范之阿育王碑行間茂密。楊之大仙帖。蓋外峭險並符前哲。自茲以降。宋之東坡。明之香光。亦臻妙悟。東坡云我雖不善書。解書莫如我。苟能通其意。常謂不學可。香光云畫中須直。不得輕易偏軟。探厥詞旨。可謂心通八法者矣。若二公肆力九宮。豈必遠後古人乎。是故善學者道蘇須知其瀾漫。由董須知其凋疎。汰瀾漫則雄逸顯避凋疎則簡澹真。余年廿六而後學。四十而後知少小惡札。脫於心而膠於手。精力既衰。又迫物務。豈望有成。庶幾述其心得。以授子弟。童而習之。或有能繼志以成名者云爾。

歷下筆譚

秦程邈作隸書。漢謂之今文。蓋省篆之環曲以爲易直。世所傳秦漢金石。凡筆近篆而體近真者。皆隸書也。及中郎變隸而作八分八背也。言其勢左右分布相背然也。魏晉以來。皆傳中郎之法。則又以八分入隸。始成今真書之形。是以六朝至唐。皆稱真書爲隸。自唐人誤以八爲數字。及宋遂并混分隸之名。竊謂大篆多取象形體。勢錯綜。小篆就大篆減爲整齊。隸就小篆減爲平直。分則縱隸體而出。以駿發真。又約分勢而歸於迤麗。相承之故端的可尋。故隸真雖爲一體。而論結字則隸爲分源。論用筆則分爲真本也。西晉分書孫夫人碑是孔羨法嗣。用筆沈痛不減。而體稍疎雋。太公望碑是乙瑛法嗣。結字宕逸相逼。而

氣加凝整大率晉人分法原本鍾梁尤近隸勢自北魏以逮唐初皆宗孫夫人及會稽晚出始尚太公望極於韓史益趨便媚分法不古隸勢因之晉人隸書世無傳石研究二碑可以意測蓋中郎立極梁傳其勢鍾傳其韻後遂判爲二派至近人鄧石如始合二家以追中郎未可以時代優劣也

北朝隸書雖率導源分篆然皆極意波發力求跌宕凡以中郎既往鍾梁並起各矜巧妙門戶益開踵事增華窮情盡致而般若碑渾穆簡靜自在滿足與鄼閣頌析里橋同法用意逼近章草當是西晉人專精蔡體之書無一筆闖入山陰故知爲右軍以前法物儻其意境惟有香象渡河已平原會稽各學之而得其性之所近反覆玩味絕無神奇但見點畫樸實八面深穩更無欠缺處耳求之彙帖征西出師頌大令保母志可稱一家眷屬以其絕去作用處相同故也

絳帖刻桓山頌獻之銘六字相傳爲大令書沈雄宕逸誠亦希有然以儻般若碑則如羅漢具六大神通及見入定古佛不免偏袒膜拜耳穆子容碑乃其雲礎

北碑體多旁出鄭文公碑字獨真正而篆勢分韻草情畢具其中布白本乙瑛措畫本石鼓與草同源故自署曰草篆不言分者體近易見也以中明壇題名雲峯山五言驗之爲中岳先生書無疑碑稱其才冠祕穎研圖注篆不虛耳南朝遺跡唯鶴銘石闕二種蕭散駿逸殊途同歸而鶴銘刊泐已甚石闕不過十餘字又係反刻此碑字逾千言其空白之處乃以摩崖石切讓字均行並非剝損真文苑奇珍也

刁惠公志最茂密平原於茂字少理會會稽於密字書欠工夫書評謂太傅茂密右軍雄強雄則生氣勃發故能茂強則神理完足故能密是茂密之妙已概雄強也

北魏書經石嶠大字雲峯山五言鄭文公碑刁惠公志爲一種皆出乙瑛有雲鶴海鷗之態張公清頌賈使君魏靈藏楊大眼始平公各造像爲一種皆出孔羨具龍威虎震之規李仲璇敬顯儻別成一種與右軍致相近在永師千文之右或出衛瓘而無可證驗隋龍藏寺庶幾紹法遜其淡遠之神而體勢更純二齊雋脩羅碑措畫結體極意經營雖以險峻取勝而波發仍歸蘊藉北朝書承漢魏勢率尙扁此易爲長漸趨委媚已爲率更開山朱君山碑用筆尤宕逸字勢正方整齊而具變態其行畫特多偏曲骨血峻秀蓋得於秦篆山谷以箭鋒所直人馬應弦爲有韻驗以此書信爲知言諫議學之而不盡遂成平滯一路濫觴矣

古人書有定法隨字形大小爲勢武定玉佛記字方小半寸刁惠公朱君山字方大半寸張猛龍等碑字方寸鄭文公中明壇字方二寸各碑額雲峯山詩瘞鶴銘侍中石闕字方四五寸雲峯峴竦兩山刻經字皆方尺泰山刻經字方尺七八寸書體雖殊而大小相等則法出一轍至書碑題額本出一手大小既殊則筆法頓異後人目爲彙帖所曉於是黃庭樂毅展爲方丈之謬說此自唐以來榜署字遂無可觀者也

北朝人書落筆峻而結體莊和行墨澀而取勢排宕萬毫齊力故能峻五指齊力故能澀分隸相通之故原不關乎迹象長史之觀於擔夫爭道東坡之喻以上水撐船皆悟到此間也用筆之法見於畫之兩端而古人雄厚恣肆令人斷不可企及者則在畫之中截蓋兩端出入操縱之故尚有迹象可尋其中截之所以豐而不怯實而不空者非骨勢洞達不能倖致更有以兩端雄肆而彌使

中截空怯者試取古帖橫直畫蒙其兩端而玩其中截則人人共見矣中實之妙武德以後遂難言之近人鄧石如書中截無不圓滿逾麗其次劉文清中截近左處亦能潔淨充足此外則並未夢見古今書訣俱未及此惟思白有筆畫中須直不得輕易偏軟之說雖非道出眞際知識固自不同其跋杜牧之張好好詩云大有六朝風韻者蓋亦賞其中截有豐實處在也

北碑畫勢甚長雖短如黍米細如纖毫而出入收放偃仰向背避就朝揖之法備具起筆處順入者無缺鋒逆入者無漲墨每折必潔淨作點尤精深是以雍容寬綽無畫不長後人着意留筆則駐鋒折穎之處墨多外溢未及備法而畫已成故舉止匆遽界恆苦促畫恆苦短雖以平原雄傑未免斯病至於作勢裹鋒斂墨入內以求條鬯手足則一畫既不完善數畫更不變化意恆傷淺勢恆傷薄得此失彼殆非自主山谷謂征西出師頌筆短意長同此妙悟然渠必見真迹故有是契若求之彙帖卽北宋聚本不能傳此神解境無所觸識且不及况云實證耶

北碑字有定法而出之自在故多變態唐人書無定勢而出之矜持故形板刻

十三跋是僞物子昂雖陋未必至是然今世盛行其說受病最深處無如陳隋人結字非不古而乏俊氣二語五百年來佳子弟多爲所誤夫千人曰俊君子正衣冠尊瞻視儼然可畏所以爲有俊氣也豈必齷笑慵妝作失行婦人狀哉永叔曰書至梁陳之際而工極余嘗歎爲知言惜南朝禁立碑墓志出土惟保母一種而原軛又亡幸有始興王碑剝蝕之餘尙可以證前說之謬妄思白但於彙帖求六朝故自言廿年學魏晉無入處及學宋人乃得真解蓋彙帖皆宋人所摹固不如宋人自書之機神完足也近人王澍

謂江南足拓不如河北斷碑亦爲有見地者。

唐人草法推張長史錢醉僧楊少師三家。長史書源虞陸故醉僧以爲洛下遇顏尚書自言受筆於長史。聞斯八法若有所得世所傳肚痛春草東明秋寒諸帖皆非真迹惟千文殘本二百餘字伏如虎臥起如龍跳頓如山峙挫如泉流上接永興下開魯郡是爲草隸醉僧所傳大小千文亦是僞物惟聖母律公導源篆籀渾雄鷙健是爲草篆少師韭花起居法皆出仿寫至大仙帖逆入平出步步崛強有猿騰蠻屈之勢周隋分書之一變是爲草分其餘如屏風書譜絕交諸帖雖俱托體山陰止成藁行而已。

自唐迄明書有門戶者廿人爰爲續評永興如白鶴翔雲人仰丹頂河南如孔雀坂佛花散金屏王知敬如振鶯集而有容柳誠懸如關雎摯而有別薛少保如雛鵠具千里之志鍾紹京如新鶯矜百囀之聲率更如虎餓而愈健北海如熊肥而更捷平原如耕牛穩實而利民用會稽如戰馬雄肆而解人意景度如岱巒強轄布武緊密范的如明駝舒步舉止軒昂玉局如丙吉問牛能持大體端明如子陽據蜀徒飾鑾輿山谷如梁武寫經心儀利益海岳如張湯執法比用重輕子昂如挾瑟燕姬矜寵善狎伯幾如負暄野老嘈雜不辭京兆如戎人呀布不知麻性宗伯如龍女參禪欲證男果

後附四則

樅陽門三大字在安徽城南門字徑二尺許雍容揖讓是山陰家法唯門字右直稍挺腹不敢徑指爲右軍書耳趙州城內永興所書攀龍鱗附鳳翼六 大字尺寸與樅陽門相當比之則脚忙手亂局促窘迫不自賴矣庾亮持江西節右軍爲其從事或庾自書或使王書時右軍年少書勢或稍加作用未可知也

然斷非永師以下所能至矣。

天監井欄在茅山可辨者尙有數十字。字勢一同瘞鶴銘。其字同者則筆法結法悉同。可證鶴銘爲隱居書。而逋翁清臣之說廢已。

杭州龔定庵藏宋拓八關齊七十二字。一見疑爲鶴銘。始知古人鶴銘極似顏書之說有故。蘆州城內有太白書觀音之閣四大字。字徑七八尺。整暇有永興風。唯筆勢稍拋鬆耳。然較逍遙樓顏書。相去不可數計。

與金壇段鶴臺玉立明經論書次東坡韻

昔吾語文筆於中必有我。蜜成花不見。持以論書可錯。綜理相安。避就形時。樞常能伏紙驕。始得見筆娜。轉換心如旋。駿發勢每頗。攝水墨無溢。開鋒毫不裹。鋒毫辨微芒。水墨分纖塵。嗟此二十年。長者力先荷。聞聲震合弦。譬巧知扣筈。只今兩少師。傳書苦不夥。變法心何雄。涉險氣振惰。俗學貪速成。錦繡被驚跋。步顏擁肥姬。趨歐牽病駢。若謂吾言非試與。訊江左爲蠻。花之精淳而爲蜜。其津沉而爲蠟。蠟中亦無花迹。乃醣之事。只今八句言。採之事。凡作書無論何體。必須筋骨血肉備具。筋者鋒之所爲。骨者毫之所爲。血者水之所爲。肉者墨之所爲。鑄爲筆之精。水爲墨之鑄。鋒能將副毫。則水受攝。副毫不裹鋒。則墨受運。而其勢無不適潤矣。王侍中傳右軍之訣云。萬毫齊力。予嘗申之曰。五指齊力。蓋指力有偏重。則毫力必不中。其勢無不適潤矣。楊景度兩少師皆神明於指法。故一江左書勢。而江左書意反賴以傳。但知之者罕矣。

附旌德姚配中仲虞和作

書學緘祕多啓籥。恃有我。我氣果浩然。大小靡不可。使轉貫初終。形體隨偏輒。如松對月闊。如柳迎風。

書之大局以氣爲主使轉所以行氣氣導古人之筋骨則形體隨之無不如志。古人之氣祕閉矣。請言使轉方。按提平且頗注墨枯還榮。展毫糾異。裹骨有筋。則血脈不融。不提則筋不勁。不平則肉不勻。不頗則骨不駿。圓則按提是爲翻轉。知較翻則墨自不枯。而毫自不裏矣。此使轉之真體也。象密也。尤有空盤紆與草爭吵。草原一脈承真亦千鈞荷。速無迹可尋。草用盤紆于實其行也。圓者則圓本自分。篆方者則翻圓者用盤紆不能翻。則滯而成疣。圓不知綴。則瘡而爲瘻。河南用綴多。行以抽筆。渤海用翻多。行以掣筆。抽用按提掣用平頗兩家之所以分也。歐褚合則宛然舊觀矣。愧余玩索頻徒戒臨摹惰行之雖有時至焉每苦跋先路道懇勤邇途騁駛職旨哉雙楫篇後塵附諸左論書十二絕句有序。

書道以用筆爲主。然明於源流所自。則筆法因之。故紀漢世以來迄於近今。宗派脈絡次爲韻語。其人所共見。而名實復副者。概從略焉。己卯季秋。書於歷下西司公廨。

程隸原因李篆生。蔡分展足始縱橫。更依分勢成今隸。不辨真源漫證盟。說詳筆譚。自真隸名別。而古人筆法始失。

中郎派別有鍾梁。茂密雄強正雁行。底事千文傳祖法。頓教分隸意參商。

鍾之乙瑛。梁之孔羨。北朝隸石恪守兩宗。至隸不本分草。不本篆實濫觴於真草千文。其自題曰真書。蓋亦有意變古也。

呂望翩仙接乙瑛。峻嚴孔羨毓任城。歐徐倒置滋流弊。具體還應溯巨卿。西晉分書有太公。望任城太守孫夫人二碑。雖峻逸殊科。而皆曲折頓宕。姿致天成。至率更法任城。會

稽法呂望惟於波發注意其牽引環轉處多行以今隸之法中郎洞達之風息已

朱揚張賈是梁宗渤海滎陽勢紹鍾更有貞珉鐫般若便齊李蔡起三峯

滎陽鄭羲渤海刁遵朱羲章楊大眼張猛龍賈思伯皆北魏碑般若碑字方二寸三百言尙完好無時
代年月書勢敦厚渾雄予臆定爲西晉人書實古今第一真書石本也

從來大字苦拘摶岱麓江崖若比肩多謝雲封經石峪不教山谷盡書禪
泰山經石峪大字完好者不下二百與焦山鶴銘相近而淵穆時或過之

梁武平書致有神一言常使見全身雲峯山下摩殘碣嘯樹低腰認未真
鄭文公季子道昭自稱中岳先生有雲峯山五言及題名十餘處字勢巧妙俊麗近南朝郗超謝萬常
疑其父墓下碑經石峪大字刁惠公誌出其手也

中正冲和龍藏碑擅場或出永禪師山陰面目迷梨棗誰見匡廬霧霽時

隋龍藏寺出魏李仲璇敬顯雋兩碑而加純淨左規右矩近千文而雅健過之書平謂右軍字勢雄強
此其庶幾若如閣帖所刻絕不見雄強之妙卽定武蘭亭亦未稱也

伯英遺篆爲狂草長史偏從隸勢來八法幸窺龍虎氣東明春草總成灰

伯英變章爲草歷大令而至伯高始能窮奇盡勢然唯千文二百餘字是真跡他帖皆趙宋以後俗手
所爲余玩千文而悟伯高爲草隸藏真爲草篆景度爲草分雖同出伯英得筆各有原本然征西風流
遂爾邈絕此大令所爲歎章草宏逸也

三唐試判俗書胚。習氣原從褚氏開。堯頌只今留片石。猶無塵染筆端來。

先任城公堯公頌。駿和兼至唐石本之恪。守古法者。

巨川官告是書雄。健舉沈追勢並工。悟入指尖有爐冶。轉毫猶憾墨痕豐。

謂會稽本唐帖。真書之善自變者。行書則蘭亭題句。同此妙悟。

洛陽草勢通分勢。以側爲雄曲作渾。董力蘇資縱奇絕。問津須是到河源。

東坡香光俱得力於景度。然東坡謂其雄傑有顏柳之遺。香光謂其以險絕爲奇。破方爲圓。削繁成簡。是猶未見彼結胎入悟處也。

無端天遣懷寧老。上蔡中郎合繼聲。一任劉姚誇絕詣。偏師爭與撼長城。

諸城劉文清相國少習香光壯遷坡老七十以後潛心北朝碑版雖精力已衰未能深造然意興學識超然塵外桐城姚惜抱京堂晚而工書專精大令爲方寸行草宕逸而不空怯時出華亭之外其半寸以內真書潔淨而能恣肆多所自得懷寧布衣鄧石如顏伯篆隸分真狂草五體兼工一點一畫若奮若搏蓋自武德以後間氣所鍾百年來書學能自樹立者莫或與參非一時一州之所得專美也。

國朝書品

平和簡靜。邈麗天成。曰神品。

醞釀無迹。橫直相安。曰能品。

逐迹窮源。思力交至。曰妙品。

楚調自歌不謬風雅。曰逸品。
墨守迹象雅有門庭。曰佳品。

右爲品五。妙品以降各分上下。共爲九等。能者二等。仰接先民。俯授來學。積力既深。或臻神妙。逸取天趣。味從卷軸。若能以古爲師。便不外於妙道。佳品諸君。雖心悟無聞。而其則不失攻苦之效。未可泯沒。至於狂怪軟媚。並係俗書。縱負時名。難入真鑑。庶使雅俗殊途。指歸不昧。其人皆以旣往爲斷。就所見而條別之。同等則紹以世序爲其後。先道光四年正月望日。涇包世臣慎伯甫編次。

神品一人

鄧石如隸及篆書。

妙品上一人

鄧石如分及真書。

妙品下二人

劉墉小真書。

能品上七人

釋邱山真及行書。

傅山草書。

鄧石如草書。

宋珏分及榜書。
姜宸英行書。

劉墉榜書。

黃乙生行榜書。

能品下二十三人

王鐸草書。

笪重光行書。

趙潤草榜書。

劉紹庭草榜書。

霍賜履草書。

周於禮行書。

翁方綱行書。

巴慰祖分書。

張惠言篆書。

劉墉行書。

錢伯坰行及榜書。

黃乙生小真行書。

逸品上十五人

顧炎武正書。

周亮工草書。

吳大來草書。

張照行書。

吳襄行書。

王澍行書。

梁巘真及行書。

于令沂行書。

顧光旭行書。

王文治方寸真書。

陳希祖行書。

釋雪浪行書。

高其佩行書。

程邃行書。

金農分書。

袁枚行書。

朱珪真書。

宋鎔行書。

逸品下十六人

王時敏行及分書。

程京萼行書。

趙青葵真及行書。

程瑤田小真書。

汪中行書。

陳淮行書。

程世淳行書。

伊秉綬行書。

鄭簠分及行書。

陳洪綬行書。

紀映鐘行書。

張鵬翀行書。

朱筠稿書。

鄧石如行書。

朱鑒尊分及行書。

錢載行書。

釋道濟行書。

巴慰祖行書。

畢涵行書。

姚鼐小真書。

李天激行書。

張桂巖行書。

佳品上二十二人

沈荃真書。

先著行書。

汪士鋐真書。

陳奕禧行書。

徐良行書。

于振行書。

孔繼涑行書。

錢澧行書。

翁方綱小真書。

康基田行書。

谷際岐行書。

佳品下十人

鄭來行書。

方觀承行書。

華嵒行書。

林佶小真書。

董邦達行書。

秦大士行書。

王鴻緒行書。

查士標行書。

何焯小真書。

陳鵬年行書。

蔣衡真書。

趙知希草書。

嵇璜真書。

桂馥分書。

張燕昌小真書。

錢坫篆書。

洪梧小真書。

高方小真書。

吳俊行書。

金榜真書。

陳崇本小真書。

九品共九十七人重疊見者六人實九十一人又在都下前門西猪市口堆子前路北見火鑊店櫃上立招牌兩塊有只此一家言無二價八字字徑七寸墨書白粉版版裂如蛇跗其書優入妙品詢之不得主名附記於此。

道光廿四年重錄增能品上一人張琦真行及分書能品下三人于書佃行書段玉立小真及草書吳德旋行書佳品上六人吳育篆及行書方履籛分書梅植之行書朱昂之行書李兆洛行書徐準宜真書。

答熙載九問

問自來論真書以不失篆分遺意爲上前人實之以筆畫近似者而先生駁之信矣究竟篆分遺意寓於真書從何處見。

篆書之圓勁滿足以鋒直行於畫中也分書之駿發滿足以毫平鋪於紙上也真書能斂墨入毫使鋒不側者篆意也能以鋒攝墨使毫不裹者分意也有漲墨而篆意湮有側筆而分意漓誠懸景度以後遂滔滔不可止矣。

問先生常言草書自有法非字體之說也究竟何者爲草法。

書譜云真以點畫爲形質使轉爲性情草以使轉爲形質點畫爲性情是真能傳草法者世人知真書之

妙在使轉。而不知草書之妙在點畫。此草法所爲不傳也。大令草常一筆環轉。如火箸劃灰。不見起止。然精心探玩。其環轉處。悉具起伏頓挫。皆成點畫之勢。由其筆力精熟。故無垂不縮。無往不收。形質成而性情見。所謂畫變起伏。點殊顛挫。導之泉注。頓之山安也。後人作草。心中之部分。旣無定則。毫端之轉換。又復幽莽。任筆爲體。脚忙手亂。形質尙不備具。更何從說到性情乎。蓋必點畫寓使轉之中。卽性情發形質之內。望其體勢。肆逸飄忽。幾不復可辨識。而節節換筆。筆心皆行畫中。與真書無異。過庭所爲言張不真。而點畫狼籍。指出楷式。抉破窯奧也。至謂鍾不草。而使轉縱橫。此語并傳盡真法。蓋端莊平直。真勢也。古人一點一畫。皆使鋒轉筆以成之。非至起止掣曳之處。乃用使轉縱橫者。無處不達之謂也。盤紆跳蕩。草勢也。古人一牽一連。筆皆旋轉正心。著紙無一黍米倒塌處。狼籍者。觸目悉是之謂也。草法不傳。實由真法之不傳。真草同源。只是運指換筆。真則人人共習。而習焉不察。草則習之者少。故謂草法不傳耳。然草書部分。亦是一大事。晉書所謂殺字甚安。是專言結構。不力究此義。所以日趨狂怪。繚繞而不可止也。草故有法。然豈有別法哉。千年黑洞。今始鑿出一線天然。工力互有深淺。吳郡所爲嘆右軍博涉多優也。抑余有更爲吳郡進一步解者。書之形質。如人之五官四體。書之惰性。如人之作止語默。必如相人書所謂五官成。四體稱。乃可謂之形質完善。非是則爲缺陷。必如禮經所謂九容。乃得性情之正。非是則爲邪僻。故真書以平和爲上。而駿宕次之。草書以簡靜爲上。而雄肆次之。是故有形質而無惰性。則不得爲人情性乖戾。又烏得爲人乎。明乎此。而自力不勤。古人未嘗不可企及耳。

問先生常言左右牝牡相得。而近又改言氣滿。究竟其法是一是二。

作者一法觀者兩法左右牝牡固是精神中事然尚有形勢可言氣滿則離形勢而專說精神故有左右牝牡皆相得而氣尙不滿者氣滿則左右牝牡自無不相得者矣言左右必有中中如川之泓左右之水皆攝於泓若氣滿則是來源極旺滿河走溜不分中邊一目所及更無少欠闕處然非先從左右牝牡用功力豈能倖致氣滿哉氣滿如大力人精通拳勢無心防備而四面有犯者無不應之裕如也

問吳興言結字因時相沿用筆千古不易陳隋人結字非不古而乏俊氣此又存乎其人華亭云古人以章法爲一大事嘗見襄陽西園記端若引繩此非必有迹象乃平日留心章法故耳二說孰優趙董二說皆陋結字本於用筆古人用筆悉是峻落反收則結字自然奇縱若以吳興平順之筆而運山陰矯變之勢則不成字矣分行布白非停匀之說也若以端若引繩爲深於章法此則史匠之能事耳故結體以右軍爲至奇祕閣所刻之黃庭南唐所刻之畫贊一望唯見其氣充滿而勢俊逸逐字逐畫衡以近世體勢幾不辨爲何字蓋其筆力驚絕能使點畫蕩漾空際迴互成趣大令十三行稍次之曹娥碑俊朗殊甚而結字序畫漸開後人勻稱門戶當是右軍舊摹後代筆人所爲或出羊侍中而後人以爲王體誤收右軍帖中耳樂毅論各本皆是唐人自書非出摹拓只爲體勢之平實由筆勢之近北碑以清頌碑玉佛記爲最奇然較十三行已爲平近無論贊畫黃庭也內帖經縱勢取姿可謂有韻然序畫雅無奇趣鶴銘神理正同內景以爲右軍書者皆非景見匡廬真相者也降至王侍中用筆漸平而結字益實蓋二王以前之書無論真行能中所無不能撮合偏旁自創一字以參其間侍中以下則漸可以後人體勢入之而不嫌矣草書唯皇象索靖筆鼓盪而勢峻密殆右軍所不及伯英諸帖大都是大令書聖於狂草空

前絕後只是行以篆法下筆如鷹鵠搏擊邇而不褊疎而不凋雖經擲行尙可想所向無空闊之意態也。問前人言小字如大字褚遂良以後經生祖述亦有能者大字如小字未之見也題署如細字跌宕自在唯米襄陽近之斯語是否。

小字如大字以言用法之備取勢之遠耳河南偏體珠玉頗有行步媚蠱之意未足爲小字如大字也大字如小字以形容其雍容俯仰不爲空闊所震懾耳襄陽側媚跳盪專以救應藏身志在束濕而時時有收拾不及處正是力弱膽怯何能大字如小字乎小字如大字必也黃庭曠蕩處直任萬馬奔騰而藩籬完固有率然之勢大字如小字唯鶴銘之如意指揮經石峪之頓挫安詳斯足當之。

問每作一波常三過折無垂不縮無往不收先生每舉此語以示學者而細玩古帖頗不盡然卽觀先生作字又多直來直去二法是同是異。

學書如學拳學拳者身法步法手法扭筋對骨出手起脚必極筋所能至使之內氣通而外勁出予所以謂臨摹古帖筆畫地步必比帖肥長過半乃能盡其勢而傳其意者也至學拳已成真氣養足其骨節節可轉其筋條條皆直雖對強敵可以一指取之於分寸之間若無事者書家自運之道亦如是矣蓋其直來直去已備過折收縮之用觀者見其落筆如飛不復察筆先之故卽書者亦不自覺也若逕以直來直去爲法不從事於支積節累則大謬矣。

問匀淨無過吳興上下直如貫珠而勢不相承左右齊如飛雁而意不相顧何耶。吳興書筆專用平順一點一畫一字一行排次頂接而成古帖字體大小頗有相逕庭者如老翁攜幼孫

行長短參差而情意真摯。痛癢相關。吳興書則如市人入隘巷。魚貫徐行。而爭先競後之色。人人見面。安能使上下左右空白有字哉。其所以盛行數百年者。徒以便經生胥史故耳。然竟不能廢者。以其筆雖平順。而來去出入處。皆有曲折停蓄。其後學吳興者。雖極似。而曲折停蓄不存。惟求勻淨。是以一時雖爲經生胥史所宗。尙不旋踵而煙銷火滅也。

問華亭言學少師大仙帖。得其破方爲圓削繁成簡之妙。先生嘗是其言。再三尋討。不得其故。香光論書。以此二語爲最精。從過庭泯規矩於方圓。遁鉤繩之曲直。悟入非果得於學大仙帖也。此以香光所詣而知之。至大仙帖。卽今傳新步虛詞。望之如狂草。不辨一字。細心求之。則真行相參耳。以真行聯綴成冊。而使人望爲狂草。此其破削之神也。蓋少師結字善移部位。自二王以至顏柳之舊勢。皆以展蹙變之。故按其點畫如真行。而相其氣勢。則狂草。山谷云。世人盡學蘭亭面目。而獨得神理也。蘭亭神理。在似奇反正。若斷還連八字。是以風子下筆。便到烏絲闌。言其變盡蘭亭面目。而獨得神理也。蘭亭神理。在似奇反正。若斷還連八字。是以一望宜人。而究其結字序畫之故。則奇怪幻化。不可方物。此可以均天下國家。可以辭爵祿。可以蹈白刃。之中庸。而非非之無舉。刺之無刺之中庸也。少師則反其道而用之。正如尼山之用狂狷。書至唐季。非詭異。卽軟媚。軟媚如鄉愿。詭異如素隱。非少師之險絕斷無以挽其頽波。真是由狷入狂。復以狂用狷者。狂狷所爲可用。其要歸固不悖於中行也。

問先生嘗云。道蘇須汰瀾漫。由董宜避凋疎。瀾漫凋疎。章法中事乎。筆法中事乎。汰之避之。從何處著手。

瀾漫凋疎。見於章法。而源於筆法。花到十分名瀾漫者。菁華內竭。而顏色外褪也。草木秋深。葉凋而枝疎者。以生意內凝。而生氣外散也。書之瀾漫。由於力弱。筆不能攝墨。指不能伏筆。任意出之。故瀾漫之弊。至幅後尤甚。凋疎由於氣怯。筆力盡於畫中。結法止於字內。矜心持之。故凋疎之態。在幅首尤甚。汰之避之。唯在練筆。筆中實。則積成字。累成行。綴成幅。而氣皆滿。氣滿則二弊去矣。寶晉齋辭中令書。畫瘦行寬。而不凋疎者。氣滿也。戲鴻堂摘句蘭亭詩。張好好詩。結法率易。格致散亂。而不瀾漫者。氣滿也。氣滿由於中實。中實由於指勁。此詣甚難。至不可不知也。

答三子問

修存問先生薄吳郡書。而常舉其言爲學者法。其所謂察之尙精。擬之貴似。先察後擬者。將毋必能察而後能擬耶。敢問古帖真僞優劣。如何能精其察。

書道妙在性情。能在形質。然性情得於心。而難名。形質當於目。而有據。故擬與察。皆形質中事也。古帖之異於後人者。在善用曲。閣本所載張華王導庾亮王廙諸書。其行畫無有一黍米許而不曲者。右軍已爲稍直。子敬又加甚焉。至永師。則非使轉處。不復見用曲之妙矣。嘗謂人之一身。曾無分寸平直處。大山之麓。多直出。然步之。則措足皆曲。若積土爲峯巒。雖略具起伏之狀。而其氣皆直。爲川者。必使之曲。而循岸終見其直。若天成之長江大河。一望數百里。瞭之如弦。然揚帆中流。曾不見有直波。少溫自矜其書。於山川得流峙之形者。殆謂此也。曾憶相人書有曰。眉要曲兮不要直。曲直愚人不得知。曲直之說至顯。而以爲愚人不知。則其理正通於書。故米趙之書。雖使轉處其筆皆直。而山陰僞跡。多出兩家。非明於曲直之

故惡能一目辨督哉。秦漢六朝傳碑不甚磨泐者皆具此意。彙帖得此祕密所見唯南唐祖刻數種其次則棗版閣本北宋蔡氏南宋賈氏所刻已多參以己意明之文氏王氏董氏陳氏幾於形質無存况言性情耶然能辨曲直則可以意求之有形質無形質之間而窺見古人真際也。曲直之粗跡在柔潤與硬燥凡人物之生也必柔而潤其死也必硬而燥草木亦然柔潤則肥瘦皆圓硬燥則長短皆扁是故曲直在性情而達於形質圓扁在形質而本於性情唐賢真書以渤海爲最整河南爲最暇然其飛翔跳盪不殊草勢筋搖骨轉牽掣玲瓏實有不草而使轉縱橫之妙凡以其用筆較江左爲直而視後來則猶甚曲之故也能以是察則近於精矣。

蘊生問先生言察古帖之術微妙至不可遁自宋至明真跡流傳者真僞尤雜仍用是以察乎抑別有術乎。

太傅嘔血以求中郎筆訣逸少仿鍾書勝於自運子敬少時學右軍代筆人書可見萬古名家無不由積學醞釀而得雖在體勢既成自闢門戶而意態流露其得力之處必有見端趙宋以來知名十數無論東坡之雄肆漫士之精熟思白之秀逸師法具有本末卽吳興用意結體全以王士則李寶成碑爲枕中祕而晉唐諸家亦時出其腕下至於作僞射利之徒則專取時尚之一家畫依字撫力求貌似斷不能追蹤導源以求合於形骸之外故凡得名跡一望而知爲何家者字字察其用筆結體之故或取晉意或守唐法而通篇意氣歸於本家者真跡也一望知爲何家之書細求以本家所習前人法而不見者仿書也以此察之百不失一。

震伯問善哉先生之言察也敢問擬其術從何始於何終。

始如選藥立方終如集腋成裘立方必定君藥以主症爲裘必儼毛色以飾觀斯其大都也學者有志學書先宜擇唐人字勢凝重鋒芒出入有跡象者數十字多至百言習之用油紙悉心摹出一本次用紙蓋所摹油紙上張帖臨寫不遺漲墨不辭用筆根勁紙下有本以節度其手則可以目導心追取帖上點畫起止肥瘦之跡以後逐本遞奪見與帖不似處隨手更換可以漸得古人迴互避就之故約以百過意體皆熟乃離本展大加倍盡己力以取其回鋒抽掣盤紆環結之巧又時時閉目凝神將所習之字收小如蠅頭放大如榜署以驗之皆如在覩乃爲真熟故字斷不可多也然後進求北碑習之如前法以堅其骨勢然後縱臨所習之全帖漸遍諸家以博其體勢閑其變態乃由真入行先以前法習褚蘭亭肥本筆能隨指環轉乃入閣帖唯爭座位至易滑手一入方便門難爲出路要之每習一帖必使筆法章法透入肝膈每換後帖又必使心中如無前帖積力既久習過諸家之形質性情無不奔會腕下雖曰與古爲徒實則自懷杼軸矣唯草書至難先以前法習永師千文次征西月儀二帖宜遍熟其文乃縱臨張伯英二王以及伯高殘本千文務以不真而點畫狼籍一語爲宗則擬之道得也善夫吳郡之言乎背羲獻而無失違鍾張而尙工是擬雖貴似而歸於不似也然擬進一分則察亦進一分先能察而後能擬擬旣精而察益精終身由之殆未有止境矣

書譜云。羲之入都。臨行題壁。子敬密拭除之。書易其處。私爲不惡。羲之自都返。見曰。吾去時。真大醉也。敬乃內懃。又言謝安素輕子敬之書。子敬嘗作佳書與安。謂必存錄。安輒題後答之。敬深以爲恨。之二說者。不知所自出。大約俗傳非事實。按右軍癸亥生。當西晉惠帝太安二年至甲辰生。大令爲東晉康帝建元二年至穆帝永和九年。大令年十歲。會蘭亭尚不能成詩。永和十一年春。右軍辭官誓墓居會稽。是後斷無入都理。是右軍入都至遲亦永和十年。大令年始十一。焉得有拭除父書而別作之事乎。謝安長於大令二十四歲。大令始仕。係爲安衛軍長史。太元中建太極殿。安欲大令書其榜。爲百世光。卒以難言。面不敢逼。是其極重大令。又焉得不存錄。大令佳書題後答之之事。况安爲大令父執已。又係其故吏。即不存錄其書。又何至深恨耶。大令臨命時。自言唯念及辭郗氏婚事。深爲疚心。則其他行檢無瑕可知。且南朝深重禮教。東山絲竹。尙貽譏議。以靈寶之悖逆。聞呼溫酒。遂伏地流涕不可止。况自稱勝父。如虔禮所述。乎恣意汙穢。是不可以不辨。至玉潤帖。世皆署爲右軍。以予審之。實臨海太守凝之書也。右軍卒於辛酉。當穆帝升平五年。大令年十八。升平三四年間。右軍致周益州書。有唯一小者尙未婚。過此一婚。便得至彼之言。未婚之小者。卽斥大令。前此升平一年。旦夕都邑帖。止言無奔外住。仁祖日往。尙不及蜀中山川諸奇。嗣有省足下別疏。及年政七十二帖。始訂遊目汝領峨眉之約。最後乃言待小者婚。乃能至彼。七十帖有云。吾年垂耳順。其時想已五十七八。故知是升平三四年間書也。不二年。右軍遂厭世。焉得見大令之小女玉潤。且言發痼痼疾少有差耶。臨海奉五斗米最虔。帖稱家長。是固兄之稱耳。其書視右軍差斂。而姿態遠遜。又其辭愚慤。非臨海不至是也。若保母帖。乃越僧得之。以五百金賣與韓侂胄者。書必出

大令或其時大令書尚多集字精刻以誑俛胄未可知也右軍卒辛酉年五十九至哀帝興寧三年乙丑右軍僅六十三而李氏顧七十是長於右軍七歲右軍七兒一女皆鄙夫人生帖言同生則自有妾媵然東牀坦腹右軍尙少焉得有妾反長於婿至七歲之多耶

跋榮郡王臨快雪內景二帖

古人論真行書率以不失篆分意爲上後人求其說而不得至以直點斜拂形似者當之是古碑斷壞彙帖障目筆法之不傳久矣南唐祖本宇內罕觀潭絳大觀寶晉諸刻具體宋人停雲鬱岡悉成趙法卽華亭力排吳興而戲鴻不乏趙意良由勝國盛行趙書摹鐫路熟雖從真跡上石而六朝筆妙已不可見加華亭選帖之時甫逾強仕字尙無筆鑒復有舛故旱燥帖虎兒書告淵朗帖東山帖謝莊詩帖離騷經文皇哀冊皆中岳書先摹帖中唐人書黃耆帖景德書思想帖秋深不審帖皆吳興書樂志論帝京篇皆僞書悉令竄入其真蹟唯出師頌保母志南庫本十三行朱巨川告身祭姪文劉中使新步虛詞尙可以意推見雙鉤懸掌指實掌虛之妙爲足重耳大凡六朝相傳筆法起處無尖鋒亦無駐痕收處無缺筆亦無挫鋒此所謂不失篆分遺意者虞歐褚陸李徐顏柳范楊字勢百變而此法無改宋賢唯東坡實具神解中岳一出別啓旁門吳興繼起古道遂湮華亭晚而得筆不著言詮近世諸城相國祖述華亭又從山谷筆短意長一語悟入窺破祕旨雖復結構傷巧較華亭遜其遒逸而入鋒潔淨時或過之蓋山東多北魏碑能見六朝真相此諸城之所以或過華亭也今觀榮邸書雖撫戲鴻木本而筆勢逆入平出江左風流優然若接不受氳墨之懸可謂諸城而後再逢通識者已鐵香得之裝池見示故欣忭而記之同觀者張

翰風彥惟竹林容瀾止來止昆玉徐仲平魏會容葉東卿方彥聞胡蘇門

書臨平原祭姪稿後

平原三稿以祭姪文爲最奇縱定是真跡然考祿山以天寶十三載十一月甲子舉兵未出范陽卽命安志忠將精兵守土門以遏西兵東下之路及祿山至藁城常山與其長史袁履謙出迎祿山大喜加以金紫使仍守故治兼轄附近諸軍改命蔣欽湊率曳落河百人團練兵七千守土門屬常山統轄常山以十二月丙午定起義之謀假祿山命召欽湊至郡受犒日暮抵城外常山命暫就傅舍遣屬載酒召妓醉而斬之盡殺曳落河而散土門之衆丁未祿山遣徵兵幽州之高邈自幽州返南至郡常山又遣屬計擒之少頃郡南報何千年自東都來已入境常山遣迎於驛千年已聞邈被擒指揮從騎鬪皆死因擒千年河北從風反正者十七郡常山遣其子泉明送欽湊首並邈千年至長安至太原同行之張通幽說太原尹王承業留泉明更其表別遣送都沒常山之功及太原陷泉明被擄囚於范陽先是祿山命互更諸郡守饒陽太守盧全誠一名皓不受代祿山命張獻誠將五郡兵圍四十餘日及聞常山兵起欽湊等被擒解圍遁去又祿山所命景城守爲縣尉賈載穆寧誅死祿山自東都命史思明攻之思明兵至景遣人說穆尉穆立斬之共推平原爲盟主平原遣常山之甥盧邈詣常山約同起義祿山聞常山兵起欲歸自攻之時已定十四載上日稱帝東都之議因遣蔡希德自河內將萬人擊常山思明亦與李立節自景城率萬人同至常山正月壬戌常山城陷擒常山及履謙送東都遇害史不言常山遣季明詣平原事常山郡今真定府土門在獲鹿縣去常山西一舍平原在常山東南土門非道所經且其時土門已無守兵城陷無關

土門事文爰開土門云云殊不可解及思明降平原已改刺蒲州泉明及得歸蒲州平原命泉明訪求常山之子女陷賊者泉明先至東都求得常山及履謙屍又在常山訪贖眷屬多人亦不言得季明首楓事文云再陷常山陷字當訪字之誤也賊臣不救斥太原尹王承業承業故匪人然太原距常山且六百里思明兵至常山三日城遂陷雖救亦無及也常山自起兵至城陷前後止十七日思明破常山移勝兵攻饒陽月餘仍不下而臨淮救至擊敗思明軍饒陽乃解常山之起義反正也以前趙州司戶包處遂而在肘腋不與之謀軍國饒陽距常山一程常山爲盟主復不與饒陽圖事反遠結王承業心目中唯見頭銜高卑眞白面書生也臨淮至用司戶謀遂大破思明於嘉山饒陽之忠與能不下睢陽司戶談言微中
有仲連之風而名皆不著真有幸有不幸哉

此丁酉夏臨平原稿書而刊其錯誤以應陽湖劉廉方者廉方好學治古文工北朝書於僕筆法尤爲篤嗜而忽以癸卯夏旅化於浙年廿三歲錄此爲之垂涕甲辰八月倦翁記

題隋誌拓本

嘉慶二十年西安民掘地得石誌二一隋太僕卿一太僕夫人姬氏俱正書徑半寸太僕志縱橫各三十七行夫人誌縱橫各二十七行字畫雋密詞理高華玩其筆勢斷爲率更無疑也永興稱率更曰不擇紙筆皆能如志於此拓見之蓋其指法沈實力貫毫端八面充滿更無假於外助故也率更書晚而彌峻姚辨志千字文皆大業時書其體壯實近遺教經醴泉銘擣素賦心經夢奠皆貞觀時書其體雄峻近曹娥碑二志字同千文而更遒麗書道習法易而創體難近世北朝石志出土者多矣字畫率樸茂斂分勢而

爲之至率更出始醞釀分法而盡變其勢厥後祖尙流風雖峭厲如蘭臺圓勁如裴休卒莫窺渾厚之城而謂同時儕輩竟復有學業相抗而無聞於後者乎率更碑版傳世者悉傷磨刮卽得宋拓亦非真相而二志數千年完好如新豈非墨林至寶耶太僕志極沈毅夫人志稍加研雋蓋藝之精者必凝於神下筆時因人因文寄意稍殊體勢與爲關通耳余嘗見南唐搨畫贊十三行沉肅如漢分今見二志益見山陰家法爲宋以來彙帖所沒故具說之

自跋刪擬書譜

吳郡書源出子敬序述右軍諸帖略不一及草勢是其意故不尙右軍草也學宗子敬而論排之者以文皇有餓隸之誚耳然鼓努者屈鐵抽刀之類標置者讓頭舒脚之類此在右軍無定法而子敬真行所不能免則其目擊心迷之歎亦有自來矣吳郡雖得子敬之筆至於體勢則未也書斷謂其有天材少功用真行雅於艸者正以其草無點畫處遂無字耳筆墨利病推闡幾盡而每爲腴詞掩意故刪浮言以顯名理六篇之譜亡於南宋今傳者止其敍說白石所續非吳郡指也臆測其目當爲執使轉用擬察凡是數法余他書言之已備故將刪本擬寫一通察其結法依據永師善爲變勢遂能立家予書此勢取仍舊而料白處行大都以子敬之意行之嗟夫察之者尙精擬之者貴似此卷分之則似合之則不似能知其所以不似是在精於察矣寫竟傳示修存熙載蘊生震伯當共喻此祕密道光壬辰閏月晦日

自跋草書答十二問

余自得版本閣帖篤嗜大令草乃悟吳郡不眞而點畫狼籍一語爲無上祕密及見華亭覆澄清堂帖載

右軍又頃水雨以復爲災彼何似兩行十一字嘆其如蟲網絡壁勁而復虛真吳郡所謂同自然之妙有非力運所能成因信高坐兩行素書入神高閑以下只可懸之酒肆襄陽之言良非無見徧閱唐人傳書成篇幅而不倣山陰家法者唯屏風書及書譜然屏風書遺筆處恆傷疾又形骸多有未檢書譜守法頗嚴而苦彫疎無屏風書茂密之致遂俱置不習其勢今秋薄遊武林求書者沓至行笈無可鈔錄者從友人假得書譜各臨寫數行以應之以其文多蕪稊略爲刪截返邗乃寫出刪本授子弟誦習反覆察其結構空曠而完密氣力實有過人擬之數過益能盡其得失篇端七八百言遵規矩而弊於拘束彫疎爲甚而東晉士人以下千餘言漸會佳境然消息多方以下七八百言乃有思逸神飛之樂至爲合作聞夫家有南威以至篇末則窮變態合情調心手雙暢然手敏有餘心閑不足賞會旣極略近瀾漫是故吳郡語雖過分然使稍存謙抑不盡所明則樞機永秘希風無從草法如綫藝林實載其功矣蘊生曰先生擬書譜豈欲操吳郡戈入室以伐之耶至兩答之文極言學書功用六篇之闕頓還舊觀若寫出流布斯乃明火燒蟬之盛業視擬書譜相萬也余謝以非任而友生誤聞其說以佳楮相餉遂試爲之以質蘊生道光壬辰孟冬甲子

右軍作真如草大令作草如真作真如草率更雅有神解襄陽贊以真到內史而狀之曰莊若對越俊如跳擲信爲知言然率更下筆則莊俊俱忘此則欲從末由者已作草如真有唐三家略存其意長史八法完具而不能無檢攝不及處醉僧藏鋒內轉瘦硬通神而齟挫毫不無碎缺少師鋪毫入紙至能齊力而矜奇尙褊躊躇涼涼未免已甚下此遂無可言者草法不傳其真不

傳也乎。次年二月上丁展視是卷。點畫多不稱意。驟雪如掌。目眩指拳。不復成字。

後十二日校勘晉書。見衛瓘傳云。漢興而有草書。不知作者姓名。後之善者稱杜度。崔瑗。崔實。杜氏殺字甚安。而書體微瘦。崔氏甚得筆勢。而結字少疏。張伯英因而轉精。甚巧。下筆必爲楷則。號忽忽不暇草書。至今寶爲草聖。索靖傳云。靖與衛瓘俱以草書知名。瓘筆勝靖。然有楷法。遠不能及。靖始知作草如真。乃漢晉相承草法。吳郡傳衣未遠。非由冥悟。余前讀晉書。於此章句。視爲詞藻心鏡不明。目精遂隣。是以釋子傳法名曰證盟。法必心悟。非有可傳。不得真證。難堅信受。余今日則不啻親承獅子吼也。歡喜讚歎。并記於後。以告天下後世之同此志者。

懷寧篆隸分已臻絕詣。真書雖不入晉。其平實中變化。要自不可及。唯草書一道。懷寧筆勢固如銅牆鐵壁。而虛和適麗。非其所能尙留片席。使後來者自擇所處。

十七帖疏證

十七帖初刻於澄清堂。其本未見。宋以後彙刻本。單行本。有釋文本。唐臨本。所見不下十餘種。大都入多尖鋒。出多挫鋒。轉折僵削。俗工射利所爲也。碧溪上人以余刪擬書譜已刻成。欲寫刻十七帖。以道吳郡之源。其意甚盛。故爲作是卷。梁武帝稱右軍字勢雄強。若龍跳天門。虎臥鳳閣。唐文皇稱右軍點曳之工。裁成之妙。勢似奇而反正。意若斷而還連。余遠追微旨。結體則據棗本閣帖。用筆則依祕閣黃庭文房畫贊。而參以劉宋爨龍顏。東魏張猛龍兩碑。以不失作草如真之遺意。爲自來臨寫十七帖家。開一生面。以俟異日。或得澄清堂本。證其得失。各本帖或多或少。前後編次。及釋文亦互異。又句讀多

不可離。余故據史傳。按文論世。爲之移併。隨手作行。不拘成式。而別以真書釋而疏之如左。

十七日先書鄴司馬未去卽日得足下書爲慰。先書以具示復數字。

全帖前人皆以爲與益州刺史周撫道和者。有閣本周益州送邛竹杖帖可證。以帖首二字爲名。鄴司馬名曇。字重熙。鑒字道微。之子。右軍妻之仲弟。大令前妻之父。永和一年會稽王以撫軍大將軍輔政。引爲司馬。道微嘗過王敦。留姑孰撫時爲敦從事中郎。是宜與鄴氏有舊。然重熙未嘗膺梁益之命。或遺信而附書也。

計與足下別廿六年於今。雖時書問不解渴。懷省足下。先後二書。但增歎慨。頃積雪凝寒。五十年中所無想。頃如常冀來夏秋間。或復得足下問耳。比者悠悠。如何可言。

右軍爲敦從子。至承器賞。撫以府寮爲私人。故與右軍特厚。太寧二年。敦爲逆。撫以二千人從敦敗。撫逃入西陽蠻中。是年十月。詔原敦黨。撫自歸。閏下時。右軍爲祕書郎。同在都。咸和初。司徒王導。茂宏輔政。復引爲從事中郎。旋出爲江夏相。監河北軍鎮襄陽。歷守豫章。代毋邱與監巴東軍刺益州。計自太寧三年至永和五年。適廿六年。是年大將軍褚裒北伐。敗績。悠悠。如何可言。蓋指此玩詞意。是久別得書而復者。當卽附書之先書。帖宜居前。以全帖名十七。故存其舊。

諸從並數有問。粗平安。唯修載在遠。音問不數懸。情司州疾篤。不果。西公私可恨。足下所云皆盡。事勢吾無間然。諸問想足下別具。不復具撫王氏故吏。殆拳拳右軍諸從。故詳答之。右軍以永和四年由江州刺史入爲護軍將軍在都城。故問

數達也修載名著之王廙世將之子爲鄱陽太守故云在遠司州名胡之字修齡修載之兄皆右軍同祖弟永和五年石季龍死朝議以修齡有聲譽用爲司州刺史以綏集河洛辭有疾未行而卒所云皆盡事勢吾無間然者永和六年以殷浩督揚豫徐青兗五州軍事假節圖北伐似撫來書亦不以此舉爲然與右軍有同心也書定出其時各本或有或無他帖刻者戲鴻本似出徐會稽然最有行間法

去夏得足下致邛竹杖皆至此上人多有尊老者皆卽分布令知足下遠惠之至

往在都見諸葛顯曾具問蜀中事云成都城池門屋樓觀皆是秦時司馬錯所修令人遠想慨然爲爾不信具示爲欲廣異聞

顯字依草法定是顯檢蜀志顯父攀攀父喬喬瑾次子也瞻未生前瑾命喬入蜀爲亮後恪旣族攀仍後瑾至顯乃與瞻孫京同移河東華陽國志云平蜀之明年移蜀大臣宗預廖化諸葛顯等於東按中宗卽位建康右軍年已十五時諸葛誕孫恢爲會稽太守顯或南依恢故右軍得在都見之也上距東移蓋五十二年令人六字本旁注唐人臨入正文從之

知有漢時講堂在是漢何帝時立此知畫三皇五帝以來備有畫又精妙甚可觀也彼有能畫者不能因摹取當可得不信具告

知有至此知十五字各本無唐臨及閣帖有之今依補

彼鹽井火井皆有不足下目見不爲欲廣異聞具示

朱處仁今所在往往得其書信遂不取答今因足下答其書可令必達

處仁當是龍驤將軍朱壽穆帝紀所載永和五年與撫同擊范賁平益州者也通鑑或本誤作禡西暨乃
校財別一人

以上五帖當是一書先謝遠惠次雜問蜀事末附致朱書係由護軍出守會稽後作

得足下旃罽胡桃藥二種知足下至戎鹽乃要也是服食所須知足下謂頃服食方回近之未許吾此志
知我者希此有成言無緣見卿以當一笑

至摯也別帖屢言情至此其省文非至止之至謂勤也如迨其謂之遐不謂矣之謂索戎鹽先致謝耳
方回郗愔字右軍妻之長弟史稱其棲心絕穀修黃老之術與右軍及高士許詢遊東土不樂參朝政
有適世風頃服食作須者誤未許吾此志言方回雖近道猶未能深信也

吾服食久猶爲劣劣大都比之年時爲復可可足下保愛爲上臨書但有惆悵
連上服食而申言之

天鼠膏治耳聾有驗不有驗者乃是要藥

天鼠卽今飛鼠毛赤而尖蒼白似黑狐蜀產也

以上三帖當是一書

虞安吉者昔與共事常念之今爲殿中將軍前過云與足下中表不以年老甚欲與足下爲下寮意其資
可得小郡足下可思致之耶所念故遠及
墨藪載安吉善書別帖有虞義興適道此或卽其人然史無可考帖云遠及當與撫也

來禽櫻桃青李日給滕子皆囊盛爲佳函封多不生足下所疏云此菓佳可爲致子當種之此種彼胡桃皆生也吾篤喜種菓今在田里唯以此爲事故遠及足下致此子者大惠也

上此此來禽四菓下此此會稽胡桃卽撫前所致者故云彼以明之前列菓名乃索其子定是一帖前人有謂此帖爲與桓宣武者宣武以永和三年滅蜀右軍以十一年去官帖云今在田里是去官後語宣武未再至蜀何能與宣武邪

旦夕都邑動靜清和想足下使還具時州將桓公告慰情企足下數使命也謝無奕外住數書問無他仁祖日往言尋悲酸如何可言

撫以永和九年斬蕭敬文使還指此具時州將時是也撫已由征虜安西進平西言以此功朝議當進爲鎮征極州將之榮也入升平果進鎮西其卒也贈征西桓公以永和十二年大敗姚襄於伊水收復洛陽修五陵告慰者言接其告欣慰也情企數使撫前助桓公平蜀或欲引之北伐有疏請也仁祖謝尚字尚弟弈字無奕升平一年五月尚卒朝議以尚在北得人故以弈代尚刺豫州北伐慕容雋明年卒於軍外住指此此升平一年書

省別具足下小大間爲慰多分張念足下懸情武昌諸子亦多遠宦足下兼懷並數問不老婦頃疾篤救命恆憂慮餘粗平安知足下情至

陶侃士行以咸和四年平蘇峻後由江陵移鎮巴陵五年斬郭默加督江州復移鎮武昌九年辭鎮歸

國登舟而卒屬吏畫其像於武昌西門故稱之士行十七子九子舊史有名撫妹爲士行子婦老婦右軍稱妻也

省足下別疏具彼土山川諸奇揚雄蜀都左太冲三都殊爲不備悉彼故爲多奇益令其遊目意足也可得果當告卿求迎少人足耳至時示意遲此期真以日爲歲想足下鎮彼土未有動理耳要欲及卿在彼登汶領峨眉而旋實不朽之盛事但言此心以馳於彼矣

知彼清晏歲豐又所出有無鄉故是名處且山川形勢乃爾何可以不遊目

知彼帖承上帖之意定是一書所出有無言有他處所無是當時語鄉讀如鄉也吾見於夫子之鄉言蜀本古之名邦也或以爲無一鄉或以爲有異產皆誤

足下今年政七十耶知體氣常佳此大慶也想復勤加頤養吾年垂耳順推之人理得余以爲厚幸但恐前路轉欲逼耳以爾要欲一遊目汶領非復常言足下但當保護以俟此期勿謂虛言得果此緣一段奇事也

右軍祖名正故諱作攷撫以太寧二年自歸至興寧三年卒於益州歷四十三年前在敦所已淳歷顯職史雖不言其壽數大都七十餘矣

吾有七兒一女皆同生婚娶以畢唯一小者尙未婚耳過此一婚便得至彼今內外孫有十六人足慰目前足下情至委曲故具示

同生一母也未婚之小者乃大令右軍孫楨之外孫劉瑾皆知名此帖說欲遊蜀而尙未果之故以堅

其約當是最後書各本無唯唐臨本有從之

以上十九帖定與撫

云譙周有孫高尙不出今爲所在其人有以副此志不令人依依足下具示嚴君平司馬相如揚子雲皆有後不

蜀人譙秀周之孫也李雄李驥李壽據蜀三徵而不應今爲所言蜀已內屬在察也猶在帝左右之在連下九字爲句云譙周下廿九字十七帖本所無嚴君平下十四字閣本亦別爲帖唐臨本及大觀帖皆連爲一文義爲優從之此帖定是永和三年右軍爲江州刺史時聞宣武平蜀而致之者留意人材表章氣節乃懷柔反側第一義宣武薦秀卒不起未必非此書啓之撫欲炙之士觀虞安吉帖止敍弗論資是未可與言此也

以上一帖與宣武

吾前東粗足作佳觀吾爲逸民之懷久矣足下何以等復及此似夢中語耶無緣言面爲嘆書何能悉會稽在金陵東南朝時所謂東郡東土東中皆斥會稽云吾前是辭內史後語等待也言同具逸民之志何以遲遲不決作方者誤復及此似夢中語想右軍去官時有書留之也此帖當與方回方回旣姻親又同志故措辭直爽胡桃帖未許吾此志之說所由來也此永和十一年書

瞻近無緣省告但有悲歎足下小大悉平安也云卿當來居此意遲不可言想必果言告有期耳亦度卿當不居京此旣避又節氣佳是以欣卿來也此信旨還具示問

兩告字各本俱作苦傳撫誤也晉人言苦皆謂病帖意殊不爾此此會稽避謂囂塵不及想必果言爲句告有期屬其先告來期也

知足下行至吳念違離不可居叔當西耶遲知問方回以黃門侍郎出爲吳郡守固辭乃改臨海此右軍初聞吳郡命喜其近東而致之書叔謂重熙當西謂其代荀羨爲北中郎將鎮下邳也

以上三帖皆與方回

龍保等平安也謝之甚遲見卿舅可耳至爲簡隔也今往絲布單衣財一端示致意

今往十二字各本皆別唯唐臨本合良是從之

胡母氏從妹平安故在永興居去此七十也吾在官諸理極差頃比復勿勿來示云與其婢問來信不得也

永興今蕭山此此會稽婢字絕句

彼所須藥草可示當致

須各本草法皆成頃筆駛所致耳

以上三帖不得主名大都其羣從也

道光十三年四月七八九日作於小倦遊閣兩目似霧看花而下筆如鷹鵠搏擊饒有不草使轉從橫之意但發波時有剩墨以爲憾耳嘉慶二十二年在都下爲新建余鼎鐵香作述書一卷字大才當

此書四之一而雄肆有若方丈余明經久返道山述書不知流落何所蓋二十年來作小正書唯此二種也延平劍合以告有緣安吳包世臣自記

與吳熙載書

熙載足下承以裹筆不裏筆殊異之故爲問善哉善哉近人可與言此者希矣僕亦略涉藩籬數他家之寶耳雖然不可不爲足下盡言之二王真行草具存用筆之變備矣然未嘗出裏筆也唯南庫本十三行收和顏三字有一二裏筆自係宋人摹鑄間以己意非其本然夫字始於畫畫必有起有止合衆畫以成字合衆字以成篇每畫既自成體勢衆有體勢者合自然顧盼朝揖出其中迷離幻化出其中矣裏筆則專借他畫以作此畫之勢借他字以成此字之體健者爲短長排闥之雄弱者爲便僻側媚而已故二王傳書雖中間閒畫皆起止完具刀斬斧齊如清廟之瑟朱弦疎越一唱三嘆無急管繁弦以悅淫哇之耳而神人以和移風易俗莫與善也渤海憲章右軍抽鋒一線如猿騰鶴落而泯上下相承之迹永興祖述大令裾帶飄揚而束身矩步有冠劍不可犯之色是雖舒筋斂骨刻意求工然猶未出裏筆也河南始於履險之處裏鋒取致下至徐顏益事用逆用逆而筆駛則裏鋒側入委韻生動又始間以肥瘦濃枯震耀心目後世能者多宗二家東坡尤爲上座坡老書多瀾漫時時斂鋒以凝散緩之氣裏筆之尚自此而盛思翁晚出自知才力薄怯慮其解散每以裏筆制勝然亦用之救敗耳及近人劉諸城乃專恃此又先以搭鋒養其機濃墨助其彩然後裏筆以作其勢而以枯墨顯出之遂使一幅之中濃纖相間順逆互用致飾取悅幾於齟齒墮譽矣晉字宋拓人間罕見但得一二裏筆方自謂爲盛業何能更知其實爲下乘乎

僕學裏筆廿年而後得繼求之古悟其用意傷淺力尅除之又十年乃見裏筆與用逆相近而實懸殊也用逆以換筆心篆分之祕密裏筆則如詞章家之倍犯蟬連按歌家之啾發投曲拳勇家之接步靠手雖不能盡廢要不可恃爲當家也足下資性卓絕而自力不倦自能悟入單微故以相授然不龜手藥雖出江頭洴澼人執珪之賞是足下材力自致非聚族而謀者所敢與其巧也有暇望過我面悉初暑已蒸溼珍重千萬世臣頓首

書黃修存藏宋搨廟堂碑後

貞觀刻在北宋已不可得余前得南宋庫裝王覆本北宋拓者已足見永興嗣法大令之血脈所在後其本歸閩中伊氏廿餘年思之不置是本乃南宋賈拓紙墨雖劣而格致如一可珍也大都初唐書肥本多近真帖賈恐轉拓轉肥乃磨治碑面使畫瘦始全失之而世人或以瘦爲貴宜唐法遂蕩然也永興面目似右軍神理則大令抽鋒殺字放肆豪邁古人謂爲得王筋者豈不以具牽掣勁健駿快奔奔洞目耶然亦稍異右軍遜于渤海矣修存知書而得此故具以訊之

書劉文清四智頌後

近世小真書遺諸城爲第一此尤其經心結撰者可珍也黃庭洛神之以法至諫議護命經而絕坡老思翁有意復古而蘇苦出入無操縱董苦布置不變化外此大都胥史之能事矣諸城壯歲得力思翁繼由坡老以窺閣本晚乃歸於北魏碑志所詣遂出兩家之外然其筆法則以搭鋒養勢以折鋒取委墨法則以濃用拙以燥用巧結法則打疊點畫放寬一角使白黑相當枯潤互映以作插花援鏡之致卷簾一顧

自成萬態然其心思悴於字內筋力盡於畫中必責以瑤瑈璜瑀之節則朽木爲柱有不能辭其誚者矣小真書取勢必遠而置節尙促用意必險而措畫尙平夫是以覽之無奇探之不盡唯余事斯素有默契而敝帚自享從無連篇累牘之作工力未副冥悟空深近更以目力劣甚腕不復能離几案無以發勢遠意險之妙反覆茲冊愛與惜兼逝水之傷情難自己道光癸巳二月幾望

乾嘉之間都下言書推劉諸城翁宛平兩家戈仙舟學士宛平之壻而諸城門人也嘗質諸城書詣於宛平宛平曰問汝師那一筆是古人學士以告諸城諸城曰我自成我書耳問汝岳翁那一筆是自己學士之子以此語質於僕僕曰宛平書只是工匠之精細者耳於碑帖無不徧搜默識下筆必具其體勢而筆法無聞不止無一筆是自己已也諸城冥悟筆法而微變其體勢正是深於古人必云自成我書亦稍涉矜張矣僕嘗謁諸城於江陰舟次論晉唐以來名迹甚協諸城曰吾子論古無不當者何不一論老夫得失乎僕曰中堂書可謂華亭高足諸城曰吾子何輕薄老夫耶吾書以拙勝頗謂遠紹太傅僕曰中堂豈嘗見太傅書乎太傅書傳者唯受禪乙瑛兩分碑受禪莊重乙瑛飄逸彙帖唯唐摹戎路略有乙瑛之意季直表乃近世無識者作僞中堂焉肯紹之耶中堂得力在華亭然華亭晚年漸近古澹中堂則專用巧以此稍後華亭耳諸城默然良久曰老夫數十年心力被吾子一語道破已近刻清愛堂帖被鉤摹者以世行僞吳興法逐字移改至爲失真唯其家藏石十二方乃諸城自督良工所鑄者皆小真書精妙不減墨迹諸城有攝夫人黃氏嘉興人筆勢極似唯工整已甚較諸城疎散韻味微減耳諸城晚書多出黃手小真書竟至莫辨有家書十冊黃夫人原書後諸城批答皆妙絕世人罕

有知者故附記之。

予在都市得諸城書許敬宗傳三百餘言字徑小半寸行間頗任意而樸茂中自在恣肆絕去平日作用乃近八十時書幾於拙勝老去漸於詩律細亮哉。

自跋真草錄右軍廿六帖

右軍作草如真作真如草爲百世學書人立極降至趙宋描塗戩刷之字行而其法絕於人手逮停雲戲鴻鬱岡渤海諸帖紛出而其法絕於人目余得南唐畫贊棗板閣本苦習十年不得真解乃求之郎邪臺靜閣頌乙瑛孔羨般若經瘞鶴銘鑿龍顏張猛龍諸碑始悟其法作草雖縱逸互用其環轉連屬有自三五字至八九字者而用鋒潔淨牽掣悉歸平直無一筆傷偏軟繚繞作真必斬盡枝葉流注迎送之迹至不可見而用意飛騰跌宕筋搖骨轉如懸巖掣電無一筆板刻紙上篤守此法盈科而進未嘗不具放海之勢無如冥悟雖深實證終淺又自珍正書已甚每以行草應求及目光昏坎正書盈百非返視數四不成十數年來幾於絕筆近更精力疲憊頗恐正書一脈所明遂湮復勉爲之此其一也月前爲揚州詩僧碧溪作十七帖疏證字數累千碧溪諄請熙載震伯摹勒流傳與此同是合作然彼草則俊勝於莊真則莊過於俊此本莊俊相涵較爲得矣道光癸巳季夏

書陳雲乃集其先公寫廢壽樟字爲四言詩卷後

故侍御玉方先生以書名字內稱爲華亭後身華亭爲近世書宗執筆者莫不學劣者不能似優者得其形蓋由未悉華亭源流所自也華亭受籙季海參證於北海襄陽晚皈平原而親近柳楊兩少師故其書

能於委致中出古淡爲書家中樸學然能樸而不能茂以中歲深襄陽跳盪之習故行筆不免空怯去筆時形偏謁也侍御酷嗜華亭而導源平原故形神皆肖異於世之學華亭者然侍御嘗謂世臣曰二百年士大夫善學華亭者惟諸城耳則其宗旨蓋亦主於求變而侍御之卒不變者則年爲之也然侍御終身未染襄陽故委致遜華亭而下筆時近茂則其自得固別有在矣雲乃自成童時已駿駿能發家尊之勢而侍御每作書雲乃必侍從伸紙和墨之役零章斷簡收檢棄藏珍重異聞過於舉世之展轉泥求者茲卷乃侍御書李氏壽屏後填名銜之四幅以有所竄易而別寫雲乃以銜名不文難以行遠而方二寸正書尤侍御所蘆斷不可不使流傳故翦裁集爲四言詩以迪觀者裝成後名流借觀歡喜讚歎帙如牛腰世臣謂千餘年來以書世其家者推大小歐陽大小米然沿襲家學榦不如梨以習見而易視也今雲乃用心之勤如此則賢於古人必矣

跋重刻王夫人墓誌

嘉慶丁巳吳人修短薄祠土名東山廟安設大鑄爐於殿前掘地丈餘得誌石首署王夫人尾署子二人長子珣次子缺其名之右半其左斜王旁具在羣以爲所缺者乃民字遂指爲東晉之石召鑄工穆大展拓之數紙而石損大展攜碑去遂爲所匿壬戌予至吳訪大展許以重值求一紙不可得後至揚州於修存處見初拓本較此尙多數十字其書渾厚而少變化乃中唐人習北海法者三從有義四德無虧斷非烏衣子弟語正月廿八乃歿日其年不可知歲庚戌二月廿七乃葬日按庚戌爲晉穆帝永和五年王珣以隆安四年庚子卒年五十二上溯建生係永和己酉是庚戌二月珣不過甫晦安得有次子珉哉東山

廟。係珣捨宅爲寺之舊址。亦斷無葬母於宅中之理。虎邱至唐以避諱改武。志正作武。其非晉也審矣。廉方得此。珍爲正書。鴻寶仲倫曲徇其請。廉方以原石既亡。欲囑予審定重摹。以廣其傳。未果而歿。仲遠爲終其志。予故具論之。然此志在唐。亦自罕覩。足珍也。道光癸卯十月十二日。

記兩筆工語

王興源者。歸安之善連鎮人。估筆揚州興教寺甚困。揚市羊毫無佳者。嘉慶丙寅春。興源介友人進其筆。試之而善。興源欲將去再修。謂此筆固已無弊。然見君指勢修筆勢以稱之。當益工已而信然。因問之曰。尋常市筆。差可用者不過什一二。何耶。興源曰。此修工之優劣也。能手所修。雖千百管皆精良如一。出俗工則必無幸焉。吾善連女工習紮頭。男工唯主修。然俗手取值當能手才什一。而能手出貨。當俗工亦什一。估筆者多嗜利用。筆者少真知。此市之所爲無佳筆。而佳筆之所爲難售也。能手之修筆也。其所去皆毫之曲與扁者。使圓正之毫獨出鋒到尖。含墨以着紙。故鋒皆勁直。其力能順。指以伏紙。俗工意亦如是。而目不精。手不穩。每至去圓正之毫。而扁與曲者反在所留。曲且扁之毫到尖。則力不足以攝墨。而着紙輒臃腫拳曲。遇弱紙即被裹。遇強紙即被拒。且何以發指勢以稱書意哉。丙子秋在吳門。又遇王永清。永清吳之大郎橋人。治筆于家。不傳徒。不設肆。試其羊毫尤圓健。示以興源所製。永清曰。此筆善矣。然尖善而根不善。着水則腰脹。未足言佳筆也。其修工淨已。而劣毫之根未去。選鋒雖健。被劣根間錯。不能朋諸周比。出力以到尖。書道尙頓跌轉換。而頓跌轉換時。指取筆力。常自尖達根。根有病則尖必散。是尖被根累也。劣毫失去根留。則劣毫所占之地步猶存。佳毫出力時。遇空有以自寬。其勢易以偏縮。則力不聚尖。

而直者反曲。吾之治筆也。先納筆頭於粗管。修去其曲與扁之甚者。膠尖俟乾透。乃倒梳其根。令淨換管。再繫。又擇去其不甚直而圓者。再膠再梳。又恐曲與扁者雖淨。或有員正而其材不長。不能齊尖者。廁其間。上齊則下所藏入管者少。而根硬。下齊則腰發脣而尖薄。是亦未足以發揮指力。曲折如意也。又擇而梳之。然後固繫其根。而黍以投于精管。故終筆之用。而無一褪毫。尖盡秃。而筆身仍韌好不僵也。予先後偏贊於嗜書者。兩筆工之名。遂甲吳越間。既而思之。曰。藝之精者。必通乎道。兩筆工其進乎技者耶。興源之爲說也。其有舉直錯諸枉。舉枉錯諸直之意乎。芟夷蘊崇。絕其本根。勿使能植。則善者伸。永清之藝近之矣。予故備記之。庶幾忝園牧馬童。柳州都料匠之有繼聲也。

記兩棒師語

予旣記兩筆工語爲書。因憶舊識曹竹齋之論。拳潘佩言之論。鎗錄而傳之。竹齋閩人也。江淮間健者。莫能當其一拳。故稱曹一拳。老而貧。賣卜揚州市。少年以重幣請其術。不可。予怪之。則曰。此皆無賴子。豈當授藝以助虐哉。拳棒者。古先舞蹈之遺也。君子習之所以調血脈。養壽命。其粗乃以禦侮。必彼侮而我禦之。若以之侮人。則反爲人所禦而自敗矣。無賴子以血氣侵凌。其氣浮於上。而立脚虛。故因其奔赴之勢。略藉手焉。而仆耳。人之一身。止兩拳。拳之大。纔數寸。焉足衛五尺之軀。且以接四面乎。唯養吾正氣。使周於吾身。彼之手足。近吾身。而吾之拳。即在其所近之處。以彼虛囂之氣。與吾靜定之氣接。則自無幸矣。故至精是術者。其微有二。一則精神貫注。而腹背皆乾滑如腊肉。一則氣體健舉。而額顱皆肥澤如粉粢。是皆血脉流行。應乎自然。內充實。而外和平。犯而不校者也。佩言歛人。以鎗法著聲。稱潘五先生。其言曰。鎗

長九尺而桿圓四五寸然鎗入手則全身悉委於桿故必以小腹貼桿使主運後手必盡鐸以虎口實據之前手必直令盡勢以其掌根與後手虎口反正繩綱而虛指使主導兩足亦左虛右實進退相任以趨勢使鎗尖前手尖前足尖肩尖鼻尖五尖相對而五尺之身自托蔭於數寸之桿遮閉周匝敵仗無從入犯矣其用有截有打其法曰二曰叉二以取人又以拒人此叉則彼二此二則彼叉又二循環兩鎗尖如繞指分寸間出入百合不得令相附桿一附則有仆者故曰千金難買一聲響手同則爭目同則爭氣氣之運也久暫稍殊而勝敗分焉故其術爲至靜吾授徒百數而莫能傳吾術吾之術授於師者才十之三十之七則授徒時被其非法相取之勢迫而得之於無意者也是故名師易求佳徒難訪佳徒意在必得師以天下之大求之無不如意者至名師求徒雖遇高資妙質足以授道而非其志之所存不能耐勞苦以要之永久則百貢而百見卻矣竹齋以嘉慶庚午歿於揚年八十餘佩言自丁卯回歙後遂絕信問夫兵家貴後起故曰重用兵者強輕用兵者弱又曰仁人之兵不可詐延則莫邪之長刃嬰之者斷兌則莫邪之利鋒當之者潰竹齋其知此意乎兵要在乎善附民委身於桿斯其術矣敬事無墮敬敵無墮非有迫而後得者乎人之自淑也在得師既得師以自淑矣則必求其有傳而傳之者之不可必得也古人所爲嘆志卑則輕物輕物不求助苟不求助安能理者也善夫

右記兩棒師語言武事似於書道無涉不知使鎗棒者皆有指法力聚指則氣上浮故尤重步法予嘗自題執筆圖曰全身精力到毫端定氣先將兩足安悟入鵝羣行水勢方知五指力齊難蓋作書必期名指得勁然予煉名指勁數年而其力乃過中指又數年乃使中指與名指力均以迄於今作書時少

不留意則五指之力互有輕重而萬毫之力亦從之而有參差故兩棒師說武事乃深合書道故附錄于此使來者知觸類而長求有餘師也仲虞自離揚州歸旌德閱十數年今年首夏過其家仲虞出其說智果心成頽文謂此乃傳立書之法撥鐙止宜於坐書至長幅大字不得不立書者則其法著於心成頽而注家誤會於其言執筆安足者皆以字體畫形說之蓋立書長幅必不能用左手稱翼如之勢以平其氣是以右半腹必貼几右腹貼几則左半腹側離几左足舒而注後則氣不至偏右而上浮故言長舒左足潛虛半腹也右手斜伸如一角向前者則右肩必展故言迴展右肩峻拔一角也非仲虞之精心銳思不能及此此益可證兩棒師語之通於書矣憶予初識寧化伊墨卿秉綬太守於袁浦墨卿諸城之弟子也因從問諸城法太守曰吾師授法曰指不死則畫不活其法置管于大指食指中指之尖略以爪佐管外使大指與食指作圓圈卽古龍睛之法也其以大指斜對食指者則形成鳳眼其法不能死指非真傳也予曰玩諸城書勢其執筆似不如是太守曰嘗求吾師面作書此法斷不誤人後在客邸遇周姓乃諸城侍書者自十五供諸城研墨伸紙之役至廿七諸城乃薦之閩督予因問諸城執筆之法周曰諸城作書無論大小其使筆如舞滾龍左右盤辟管隨指轉轉之甚者管或墜地予因告以太守之語周曰諸城對客作書則用龍睛法自矜爲運挽其實非也及在都晤陳玉方侍御侍御尤爲諸城高第弟子言所受之法與太守同而侍御守其法不如太守之堅故其書較勝嘗聞橫雲山人每見其甥張得天之書輒呵斥得天請筆法山人曰苦學古人則自得之得天因匿山人作書之樓上三日見山人先使人研墨盈盤卽出研墨者而鍵其門乃啓籃出繩繫於閣枋以架右肘乃作之

得天出效爲之經月。又呈書山人笑曰。汝豈見吾作書耶。古人於筆法無不自祕者。然亦以祕之甚。故求者心摯而思銳。一得其法。則必有成。後之得吾書者。慎毋以其不自祕而易視之也。道光甲辰八月廿六日倦翁記之。

完白山人傳

山人安徽懷寧之集賢關人也。姓鄧氏。字石如。其名以敬避今上御名下一字。遂以字行。而更字頑伯。集賢關當皖公山下。故又號完白山人。少產僻鄉。眇所聞見。顧獨好刻石。仿漢人印篆甚工。弱冠孤露。卽以刻石遊性。廉而尤介。無所合。七八年轉展至壽州。時亳人前巴東知縣梁巘主講壽春書院。巴東以工李邕書名天下。山人爲院中諸生刻印。又以小篆書諸生箋。巴東見之嘆曰。此子未諳古法耳。其筆勢渾鷺。余所不能充其才力。可以較轍數百年鉅公矣。因爲山人治裝。而致之江寧。舉人梅鏐。舉人爲文穆公季子。文穆雖貧宦。然梅氏自北宋爲江左甲族。聞人十數。葬藏至富。文穆又受聖祖殊遇。得祕府異珍尤多。蓋秦漢以來金石善本備在焉。山人旣至。舉人以巴東故爲山人盡出所藏。復爲具衣食楮墨之費。山人旣得縱觀。推索其意明雅俗之分。迺好石鼓文。李斯嶧山碑。太山刻石。漢開母石。闕燉煌太守碑。蘇建國山及皇象天發神識碑。李陽冰城隍廟碑三墳記。每種臨摹各百本。又苦篆體不備。手寫說文解字二十本。半年而畢。復旁搜三代鐘鼎及秦漢瓦當碑額。以縱其勢博其趣。每日昧爽起研墨盈盤。至夜分盡墨。乃就寢。寒暑不輟。五年篆書成。乃學漢分。臨史晨前後碑。華山碑。白石神君。張遷潘校官孔羨。受禪大饗。各五十本。三年分書成。山人篆法以二李爲宗。而縱橫闡闢之妙。則得之史籀。稍參隸意。殺鋒以取勁折。

故字體微方與秦漢當額文爲尤近其分書則遒麗淳質變化不可方物結體極嚴整而渾融無迹蓋約
嶧山國山之法而爲之故山人自謂吾篆未及陽冰而分不減梁鵠余深信其能擇言也山人移篆分以
作今隸與瘞鶴銘梁侍中石闕同法草書雖縱逸不入晉人而筆致蘊藉無五季以來俗氣山人客于梅
氏八年學既成梅氏家益匱不復能客山人山人乃復如前草屨擔簦徧遊名山水以書刻自給山人遊
黃山至歙鬻篆於賈肆武進編修張惠言教授歙修撰金榜家編修故深究秦篆爲修撰所器編修見山
人書于市歸語修撰曰今日得見上蔡真跡修撰驚問語以故遂冒雨偕詣山人於市側荒寺修撰卽備
禮客山人修撰家廟甚壯麗其楹皆貞石而刻聯及懸額修撰精心寫作蓋百易而後定謂莫能加于此
也及見山人書卽鳩匠斲其額而石楹旣豎不便磨治架屋而臥楹請山人書之刻成乃重建其傾服至
此山人僑居修撰家編修遂從山人受篆法一年修撰稱之於太子太傅戶部尙書曹文敏公文敏請山
人作四體千文橫卷字大徑寸一日而成文敏嘆絕具白金五百爲山人壽乾隆庚戌秋純廟八旬聖節
文敏以六月入都強山人同往山人獨戴草笠靸芒鞋策驢後文敏三日行文敏輿從以山東發水轉後
與山人相值於開山時巡撫以下命吏郊迎文敏山人策驢過轅門門者呵止之文敏坐堂上遙見山人
乃入就坐時都中工書者推相國劉文清公而鑒別則推上海左副都御史陸錫熊山人至都二公見山
人書大驚踵門求識面皆曰千數百年無此作矣山人遂留都中未幾文清左遷失勢而副憲以憂累卒

時都中作篆分者皆宗內閣學士翁方綱。閣學以山人不至其門乃力誣山人耳食者共和其說。山人頓躡出都。文敏爲治裝致之於兵部尙書兩湖總督畢沅。尙書以鑒賞名家。然于此事實疎不能知山人而深器其高尚。時吳中知名士多集節署。裘馬都麗。山人獨布衣徒步居三年辭歸。尙書留之不可。乃爲山人置田宅爲終老計。而觴山人之行曰。山人吾幕府一服清涼散也。今行矣甚爲減色。四坐慙沮。後文敏病篤。語其長子曰。吾卽逝。鄧山人必有輓聯至。汝卽以勒吾墓華表及專祠前檻足矣。山人年四十六。乃娶于某。不數年沒。繼娶于某。然山人遊興不衰。常往來江淮間。鬻書以給旅費。余以嘉慶七年識山人於鎮江。過從十餘日。以余爲能真知山人書。明年復於揚州相值。山人作太山之遊。至九年秋。山人由山東至常州。過揚不入城。及十一月杪。唔陽湖今鳳臺知縣李兆洛申耆始知余與翰風同客揚州。翰風編修弟也。余始聞山人名自翰風。時山人得家書促歸里。乃買舟回揚訪余於天心墩。而余適去東臺。山人俟余至十二月初八。乃語翰風曰。歲盡矣。去家尙千里。吾不及終待慎伯矣。遂解纜。翌日而余至。山人歸里。不復出游。遂以明年十月卒於家。年六十有三歲。子尙璽後更名密。尙幼。山人書至夥。而少碑刻。有書百軸存於家。又有百軸付懷寧大觀亭僧悟本。聞悟本守之甚慎。申耆亦藏山人各體書精良者二十幀。議勒石以永其傳。

包世臣曰。余性嗜篆分。頗知其意而未嘗致力。至於真行藁草之間。則不復後人矣。然吾見山人正書方寸以上者。簡肅沉深。雁行登善。非徐裴以下所及。余在鎮江初識山人時。嘉定錢坫獻之。陽湖錢伯炯。魯斯先生。皆與余爲忘年交。獻之自負其篆爲直接。少溫然與余同遊焦山。見壁間篆書心經。摩挲逾時。曰。

此非少溫不能作。而楮墨才可百年。世間豈有此人耶。此人而在。吾不敢復搦管矣。及見山人。知心經爲山人二十年前所作。乃撫其不合六書處。以爲詆。魯斯故服山人篆分爲絕業。及見其行草。嘆曰。此楊少師神境也。遂因余以見山人。然魯斯正行書名。自文清厭世論者推爲第一。而魯斯執筆則虛小指。以三指包管外。與大指相拒。側豪入紙。助怒張之勢。常謂永叔使指運而腕不知之論。爲指腕皆不動。以肘來去。又謂作書無以指鉤距之理。痛斥古今相承撥鐙七字之說。意以山人篆法當同迺藉山人以信其旨。及見山人作書。皆懸挽雙鉤。管隨指轉。與魯斯法大殊。遂助獻之詆。山人尤力私意所中。真識遂蒙青雲之交。不渝終始。宜山人之痛哭於編修與文敏也。

刪定吳郡書譜序

夫自古之善書者。漢魏有鍾張之絕。晉末稱二王之妙。評者云。彼之四賢。古今特絕。而今不逮古。古質而今妍。夫質以代興。妍因俗易馳。鶩沿革。物理當然。貴能古不乖時。今不同弊。余志學之年。留心翰墨。味鍾張之餘烈。挹羲獻之前規。極慮專精。時逾二紀。觀夫懸針垂露之異。奔雷墜石之奇。鴻飛獸駭之姿。鸞舞蛇驚之態。絕岸頽峯之勢。臨危據槁之形。或重若崩雲。或輕能蟬翼。導之則泉注。頓之則山安。纖纖乎似初月之出天崖。落落乎猶衆星之列河漢。同自然之妙。有非力運所能成。信可謂智巧兼優。心手雙暢。翰不虛動。下必有由。一畫之間。變起伏於峯杪。一點之內。殊劖挫於豪芒。而東晉士人互相陶染。至於王謝之族。庾郗之倫。縱不盡其神奇。咸亦挹其風味。去之滋永。斯道逾微。方復聞疑稱疑。得末行末。古今阻絕。無所質問。設有所會。緘祕已深。遂令學者茫然莫知領要。徒見成功之美。不悟所致之由。或乃就分布於

累年向規矩而猶遠圖真不悟習草將迷假令薄解草書精傳隸法則好濁偏固自闕通規加以趨事適時行草爲要題勒方幅真乃居先真以點畫爲形質使轉爲情性草以點畫爲情性使轉爲形質至於伯英不真點畫狼藉鍾繇不草使轉縱橫雖篆隸草章工用多變濟成厥美各有攸宜篆尚婉而通隸欲精而密草貴流而暢章務檢而便然後凜之以風神溫之以妍潤鼓之以枯勁和之以閑雅故可達其情性形其哀樂嗟乎不入其門詎窺其奧者也又一時而書有乖有合合則流媚乖則彫疎略言其由各有其五神怡務閑一合也感惠徇知二合也時和氣潤三合也紙墨相發四合也偶然欲書五合也心遽體留一乖也意違勢屈二乖也風燥日炎三乖也紙墨不稱四乖也情怠手闊五乖也乖合之際優劣互差得時不如得器得器不如得志若五乖同萃思遏手蒙五合交臻神融筆暢當仁者得意忘言罕陳其要企學者希風敍妙雖述猶疎不揆膚味輒効所明庶欲宏既往之風規導將來之器識除繁去濫覩迹明心者焉至於諸家勢評多涉浮華莫不外狀其形內迷其理若乃崔杜以來蕭羊已往代祀綿遠名氏滋繁或藉甚不渝人亡業顯或憑附增價身謝道衰加以糜蠶不傳搜秘將盡偶逢縑賞時亦罕窺其有顯聞當代遺跡見存無俟抑揚自標先後復有龍蛇雲露之流龜鶴花英之類巧涉丹青工虧翰墨異夫楷式非所詳焉夫心之所達不易盡於名言言之所通尚難形於紙墨今撰執使轉用之由以祛未悟執謂深淺長短之類是也使謂縱橫牽掣之類是也轉謂鉤環盤紝之類是也用謂點畫向背之類是也方復會其數法歸於一途舉前賢之未及啓後學於成規窮其根源析其枝派貴使文約理贍迹顯心通披卷可明下筆無滯詭辭異說非所詳焉今之所陳務裨學者右軍之書代多稱習良可據爲宗匠取立指歸試

言其由略陳數意止如樂毅論黃庭經東方朔畫讚太師箴蘭亭集序告誓文斯並代俗所傳眞行絕致者也寫樂毅則情多怫鬱書畫讚則意涉瓊奇黃庭經則怡懌虛無太師箴又從橫爭折暨乎蘭亭與集思逸神超私門誠誓情拘志慘所謂涉樂方笑言哀已歎豈惟駐想流波將貽嘵暖之奏馳神睢涣方思藻繪之文雖其目擊道存尙或心迷議舛莫不強名爲體共習分區豈知情動形言取會風騷之意陽舒陰慘本乎天地之心原夫所致安有體哉夫運用之方雖由己出規模所設信屬目前心不厭精手不忘熟若運用盡於精熟規矩諳於胸襟自然容與徘徊意先筆後瀟灑流落翰逸神飛嘗有好事就吾求習吾乃粗舉綱要隨而授之無不心悟手從言忘意得縱未窮於衆術斷可極於所治矣若思通楷則少不如老學成規矩老不如少思則老而逾妙學乃少而可勉勉之不已抑有三時時然一變極其分矣至如初學分布但求平正既知平正務追險絕既能險絕復歸平正初謂未及中則過之後乃通會通會之際人書俱老故以達夷險之情體權變之道亦猶謀而後動動不失宜時然後言言必中理矣是以右軍之書末年多妙當緣思慮通審志氣和平不激不厲而風規自遠子敬以下莫不鼓努爲力標置成體豈獨工用不侔亦乃神情懸隔考之卽事斷可明焉然消息多方情性不一乍剛柔以合體忽勞逸而分驅或恬澹雍容內涵筋骨或折挫槎枒外耀峯芒察之者尙精擬之者貴似況擬不能似察不能精分布猶疎形骸未檢躍泉之態未覩其妍窺井之談已聞其醜縱欲據突羲獻誣罔鍾張安能掩當年之目杜將來之口慕習之輩尤宜慎諸至有未悟淹留偏追勁疾不能迅速翻效遲重夫勁速者超逸之機淹留者賞會之致將反其速行臻會美之方專溺於遲終爽絕倫之妙能速不速所謂淹留因遲就遲詎名賞會非

夫心閑手敏難以兼通者焉假令衆妙攸歸務存骨氣骨既存矣而迺潤加之亦猶枝榦扶疎凌霜雪而彌勁花葉鮮茂與雲日而相暉如其骨力偏多迺麗蓋少則若枯槎架險巨石當路雖妍媚云闕而體質存焉若迺麗居優骨氣將劣譬夫芳林落葉空照灼而無依蘭沼漂萍徒青翠而奚託是知偏工易就盡善難求雖學宗一家而變成多體莫不隨其性欲便以爲姿質直者則徑挺不迺剛狠者又崛強無潤矜斂者弊於拘束脫易者失於規矩溫柔者傷於軟緩躁勇者過於剽迫狐疑者溺於滯澀遲重者終於蹇鈍斯皆獨行之士偏覩所乖至若數畫並施其形各異衆點齊列爲體互乖一點成一字之規一字乃終篇之准違而不犯和而不同留不常遲遺不恆疾帶燥方潤將濃遂枯泯規矩於方圓迺鉤繩之曲直窮變態於豪端合情調於紙上無間心手忘懷楷則自可背羲獻而無失違鍾張而尙工譬夫絳樹青琴殊姿其豔隋珠和璧異質同妍何必刻鶴圖龍竟慚真體得魚獲兔猶慄筌蹄聞夫家有南威之容乃可論於淑媛有龍泉之利然後議於斷割語過其分實累樞機吾嘗盡思作書謂爲甚合時稱識者輒以引示其中巧麗曾不留目或有誤失翻被嗟賞旣味所見尤喻所聞或以年職自高輕致陵誚余乃假之以標綯題之以古目則賢者改觀愚夫繼聲競賞毫末之奇罕議峯端之失夫蔡邕不謬賞孫陽不妄顧者以其玄鑒精通故不滯於耳目也向使奇韻在爨庸聽驚其妙響逸足伏櫪凡識知其絕羣則伯喈不足稱良樂未可尙也至若老姥遇題扇初怨而後請門生獲書机父削而子懊知與不知也夫士屈於不知己而申於知己彼不知也曷足怪乎故莊子曰朝菌不知晦朔蟪蛄不知春秋老子云下士聞道大笑之不笑之則不足以爲道也豈可執冰而咎夏蟲哉

自漢魏以來論書者多妍蚩雜糅條目糾紛或重述舊章了不殊於既往或苟興新說竟無益於將來徒使繁者彌繁闕者仍闕今撰爲六篇分成兩卷第其功用名曰書譜庶使一家後進奉以規模四海知者或存觀省緘祕之旨余無取焉垂拱三年寫記

吳郡論真草以點畫使轉分屬形質情性其論至精蓋點畫力求平直易成板刻板刻則謂之無使轉使轉力求姿態易入偏軟偏軟則謂之無點畫其致則殊途同歸其詞則互文見意不必泥別真草也余近彷真草千文爭坐位見其下筆無不直者乃知古人無論真草皆遺以篆意故形直而意曲是爲真曲若求曲於形失之轉遠近悟如是附記於末道光戊申九月七日重校書此

補遺

雜詩示十九弟季懷

余於書最拙。執筆能縣腕。飽後親硬黃。聊使塵心緩。舊拓楮墨香。啓匣龍蛇斷。於中吾尤愛。神龍蘭亭本。畫贊亦超然。俗刻皆奴算。日仿此二刻。搶鋒出趨管。久久覺芒角。有如純鉤剗。迺視近人書。大半沒平輞。求王雖不伯。或足固閉鍵。又復勤摹追直縱。曲有轉覆毫。抽筆心鋒常畫內。展抑悟布九宮非。必盡捺滿有神任形空。毋作秋蛇綰。苦無暇歲月。進與臨池選舉事。求過人斯病吾不免。請爲歌毛詩。甫田齊無田。右詩原刻列管情三義卷五。因篇中論摹蘭亭書贊二刻。曲盡神實形空之妙。允爲臨帖之法程。掇刊於此一隙之見。識者幸亮其妄。璜謹記。

贈山陽吳生璜

山陰傳家法。貴自然。迺麗是由懸管掉。鋒開墨不迤。筆常行畫中。一語發真諦。書勢雖萬變。要歸同此祕。柘塘有吳生。嗜好與俗戾。問年初弱冠。八法如夙肄。苦學平原贊。不受墨豬累。叉手並腳中。抽掣見蹈厲。秋鷹入骨筋。寶具凌霄勢。僕爲進一解。顏褚本一致。斂爲雁塔序。不覺肥瘦異。溯源到史籀。郁閣知從出。湯水變冬夏。大矣隨時義。悟澈是書禪。山陰證初地。

邵生碣文

生諱式穀。字子良。姓邵氏。江蘇山陽人。其家世爲武吏。而生獨業文。性尤嗜書。默而寡友。唯與邑人周寅善。周生長於生四歲。同學平原千佛寺碑二年。周生書名遂噪起。一郡求者接踵。生名雖稍減。而郡人固

以能書推生矣。嘉慶十一年生，年十七，周生年二十一，而荆溪周濟以進士任淮安教授，始至，二生以其書謁教授，弗善也。二生意不能平，遂請教授書紙尾。二生心既不然，教授書因請古人用筆結體相承之要，欲因其所得者以折之。而教授曰：「書之道微矣，其略固有可言者。大約用筆患直，則務求其曲。筆既能曲，而用意又患淺，則務求其直。其始唯直也，故其力洞達，而筋骨始能成其直，而終唯直也。故其意醇厚，而淡發有以遂其曲。此祕發於大令，而備於永興。是後莫能窺也。」吾友包君慎伯得之以授余，余既受其法，自視曩昔書及視唐宋以來名人書，遂俱弗能善也。二生卽日備禮爲教授弟子，數日，二生書皆頓改其舊，周生故貧甚，以求書者多差，自給不數月，周生自謂略解書意，而郡人遂絕無求者矣。周生益困，與生善更甚，日日偕過教授。教授又曰：「用筆必氣平而勢側，氣平故力厚，而峭利內涵，勢側故韻流而丰神外煥。」結字要外方而內圓，必先打疊中堅，使其神聚，然後縱放手足，使其局疏，分觀其畫，則歌曲偃互，合觀其字，則圓結駘宕，而其要歸於執筆運指。執筆須五指密攢，皆着指尖，若管當指節，則毫偏而指法不能撥換矣。指搦管緊，則意滯而真力不至毫端矣。肩與食指平，臂與小指平，臂曲如抱兒掌，曲如握卵，腕不動，而指不停，心不散，而息不急，則全身之力皆赴毫端，而又出之自然，故字畫圓勁，而氣勢雄遠，細如絲髮，血肉備具。此慎伯之授余者也。今悉以授二子矣。十二年秋，教授送考至江寧，則日日稱郡生善，又爲郡生乞余書。余病未能作，教授代之，余以爲不減。生一見曰：「此非包君作也。」檢字裏有置考具單，曰：「此真包君書矣。」卽袖歸裝池之置座右。十三年春，余至清江，生聞余至，時已二鼓，懷刺來。余初見生書，謂必精悍，及見生羸怯如不勝者，生出書請業。余觀其筆勢雄厚，雖受法於教授，而清爽且欲過之，因授以必

極筆力使鋒銛四殺然後聚墨筆心以取圓渾每于去筆戒側力崇淳質則盡之矣生拜受而去越三日再至呈其書則諸弊去者大半余勗生曰余自幼拙于書又無師承及二十六歲乃稍以己意求古人遺論證之墨拓則有微契焉十年來徧窺江左諸家收藏真蹟始知用簡夫每作一波常三過折者蓋爲筆心着紙則曲而副豪用力則肉勝而畫褊氣怯爲書家大忌故一筆而以三筆成之使副豪但輔筆心以去來搶衄不致着紙而成偏鋒故也今以墨裹住鋒力大指直提腕心重壓則筆心着紙而不曲副毫斂入筆心以一筆之用備三筆之功故曰簡也其法原於石鼓而見於右軍日極寒大令吳興忽動諸帖永師千文伯施廟堂以得此祕雄視千秋董華亭書性卓絕而未能解此逾急側媚少士君子之風以後轉相仿效如邱山近姜宸英等僅知步趨張照頗有工力而結法尤俗王澍枯直無血王鐸僵燥無韻近人唯鄧石如劉墉姚鼐三家爲特出鄧氏篆分逼古真書逾逸皆成家法草書亦強健行書頗染習氣劉氏用意傷巧勢雖逾媚而邊幅殊窘其得力處乃華亭之十五六耳姚氏行草超脫而不空怯小正書亦逾麗而方五六寸以外則筆勢蹇滯余識到古人而無工力教授力行甚猛而嗜好已多未能純一生其勉之生唯唯謝不敏今年春余計偕北上過清江訪生則病瘠甚六月出都而生已于首夏物故嗚呼傷已生之所就止此而天奪之後人其誰謂余不妄歎者乎其尊甫武人生書散失無復存者唯與周生往復論書十數紙尙足壽諸石使人想見其橫絕不可控馭之勢周生書性故非生比然亦教授之亞也故備紀其始末以明生志而授周生周生如能書以表生嘵者亦庶乎以道合而有始卒者也嘉慶十四年秋九月安吳友人包世臣述于吳門舟次

此予未受法小仲之前所自得執運之法也在京口見鄧懷寧其法略同益以自信及與小仲同居斷斷者三四月試之善而後從詳在述書恐閱者疑前後互異故復記此

張尚平傳

生諱秉衡字尚平姓張氏江蘇山陽之岔河鎮人岔河古柘塘地居白馬汎光兩湖之西墳土廣而腴居民築墟以捍湖漲則水耕火耨宜五種魚蝦螺蛤不勝食又西卽安徵之盱眙天長皆穀土所產集岔河又水宜染藍蘇常客民以白布來就染四至各百餘里所取給遠孔道冠蓋莫至土人率業農其事化居唯斂散穀麥少小就傅取識名姓方數能簿記而已無習舉子業者尚平族人散四鄉無譜牒遷徙世次不可紀曾祖始居岔河祖納帖主陸陳市家漸裕父璐爲國子生襲舊業母朱氏伯兄秉玉有室生二女而沒叔季弟並殤尚平幼學已略識文義國子卽命罷讀入肆司出入昕夕無少暇然性嗜學書從市上得襄陽吳興石本篝燈臨摹常分夜積十年岔河推爲書伯時尚平始弱冠忽於其里義塾師李篷樓所得余藝舟雙楫單行本讀之遂改習柳少師擘窠正書又十年點畫儕渾勁已道光己酉秋乃偕同里吳璜禮北友禮北客淮城楊步洲吟仙來袁浦執贊請筆法乃專力張猛龍昕夕枕畔不歲餘引筆如界去筆如抽刀斷水潔淨而不空怯近又以草法至難數百年皆苦偏軟繚繞力祛積弊唯起筆未能絕偏耳要以十年必可造韻紓中有方員鉤盤中有平直之域迺以咸豐二年六月十九日遇禮北夜話三鼓歸而發痧爲庸醫誤下溫劑竟以二十二日卒於家尚平初娶蕭氏繼郭氏郭稚於尚平八歲孕幾禰月患小病遘此閼因而劇父誤於醫以七月八日產一男不育十一日郭亦奄忽嗚呼傷已尚平病革時執禮

北手涕泣曰耽書吾性也自受法於安吳頗見古人用筆之祕要安吳曾以不朽相期今學業未成唯安吳可以不朽之禮北敬諾遂瞑得年三十有四歲禮北助斂奠事卽來袁浦致尙平永訣之語並云尙平有遺腹幸而男也調獲拊育責無可諉余傷悼無已心目交瘁屬辭未畢而郭氏凶問又至溯自嘉慶丁卯荆谿周濟保緒司鐸淮郡以所受筆法於余者爲淮上人士開山得邵子良式穀周寅木齋兩生次年以所業來質子良書性豪宕年初童少工力木齋差穩洽而資非上駟未幾子良謝世余爲文悼以屬木齋木齋以書雄淮郡核其所詣未足以語古也道光乙巳鹽城孫汝樾二林見余萸灣寺題壁書而善之千里負笈至白門從遊數月爲小正書近邁麗圓足己酉夏來袁浦居半載分眞並精進及見尙平禮北書嘆曰樾無他能唯書字稍傳師法可望爲吾淮冠今見張吳二子書樾瞠乎後矣禮北學書至銳然年淺力未足充其志吟仙亦奮發爲會稽書氣勢寬裕遠塵俗年更淺於禮北唯尙平學幾有成而不幸早天其書遺可觀采者禮北爲存鴻泥於貞石使後人信余非以哀逝故爲曲筆者而二林吟仙讀此傳文各及時自力禮北書性旣過人尤必志於有成以塞耄夫之望而慰尙平於泉下焉

